


YIHOOWA KAWOTETTA ERISSIYA  
**WOCHIYO KEELAA**



XANNA'IYO HUUPHE YOHOTA:  
NAASE 29-MASQQALA 25, 2016



KOYRO SINT TAA MISILIYAA:  
**DOOMINIKAN RIPUBLIKE**

Haattaa doonan de'iya Las Teranasan kokkonaatiyaa shiishshida yalagawu dumma aqinye Geeshsha Maxaa-faappe mishiraachuwaaw yootees

AASSIYAAGEETA  
**37,536**

XINAATETA  
**69,892**

GODAA KAHUWAWU  
SHIIQIDAAGEETA (2015)  
**120,103**

## KESUWAA

### 3 BANTTA DOSAN EENO GIIDOSONA —Gaanan

### 7 NAASE 29—MASQQALA 4 SAAMINTTAA Kawotettaa Koyappe Attin Aquwaa Koyoppa

Yesuusi nuuni aquwaa gidennan, 'Xoossaa kawotettaa kasetidi' koyanaadan tamarissii. Nuuni nu de'uwani ayyaanaabaa kaseyanawu waatidi aquwaabaa siiqennan aggananne nu de'uwani un'issiyaabaa aggabayana danddayiyoo? Maatiyoosa 6:25-34n odettida, Yesuusi deriyaa bollan tamarissido timirttiyan de'iya minttettiya qofaa be'a.

### 13 MASQQALA 5-11 SAAMINTTAA Nuuni 'Naagi Uttana' Bessiyoy Aybissee?

Nuuni Kiristaaneti ha wurssetta gallasan 'naagi uttanaadan' Yesuusi zoridobaa nu wozanan wottana bessees. (Maa. 24:42) Yaatanawu, Yesuusi yiyo wode nuuni beegotti uttennaadan oottana danddayiyaa-baappe haakkana bessees. Ha huuphe yohoy nuuni naagetti uttennaadan oottiyaabaa waati teqqana danddayiyaakko qonccissees.

### 18 "Yayyoppa, Taani Nena Maaddana"

### 21 MASQQALA 12-18 SAAMINTTAA Xoossaa Aaro Kehatettaa Nashshidi Ekkiyaageeta

### 26 MASQQALA 19-25 SAAMINTTAA Xoossaa Aaro Kehatettaa Mishiraachuwaaw Yootite

Ha naa"u huuphe yohoti Yihoowa aaro kehateetta nuna go"iyo dumma dumma ogiyaa qonccissoosona. Yihooway nuna siiqiyooogaa bessido dumma dumma ogiyaa wozanappe nashshiyooogee Yihoowa aaro kehateetan harati waati go'ettana danddayiyaakko etayyo yootanaadan denttettana bessiyoy aybissakokka qonccissoosona.

### 31 NABBABIYAAGEETU OYSHAA

Ha xuufee bayzettiyaaba gidenna. Kumetta sa'an Geeshsha Maxaafaa tamarissanawu giigissiyoo-baappe issuwaa gidishin, he oosoy asay ba dosan immiyo miishshan oosettes.

Miishsha immanawu koyikko, [www.jw.org](http://www.jw.org) xomoosa.

YIHOOWA KAWOTETTAA ERIISSYA  
**WOCHIYO KEELAA**

Hara qonccissoy imettana xayikko, xiqiseti ekettidoy Wolaytatto Geeshsha Maxaafaappe. "NW" giyaagee xiqisee Ooratta Alamiyaa Geeshsha Maxaafaappe ekettidooogaa bessees.

*The Watchtower* (ISSN 0043-1087) Issue 11 July 2016 is published monthly with an additional issue published in January, March, May, July, September, and November.

© 2016 Watch Tower Bible and Tract Society of Pennsylvania. Printed in Germany.


© Druck und Verlag: Wachturm Bibel- und Traktat-Gesellschaft, Selters/Ts., V. i. S. d. P. Manfred Steffensdorfer, Selters/Ts.

July 2016

Vol. 137, No. 11 WOLAITA



# Gaanan

 AASSIYAAGEETI keehi koshshiyo biitti biidi haggaaziya ishaa woy michiyo eray? Nena hegaadan oycha eray: ‘Eti hara biitti biidi haggaazanaadan denttettidabay aybee? Eti hegaadan haggaazanawu waani giigettidonaa? Taanikka hegaadan haggaazana danddayiyaanaa?’ Ha oyshatu zaaruwaa demmana danddayiyo lo’o ogee, hegaadan oottida ishaturanne michotuura haasayiyoo-gaa. Ane hegaadan oottoos.

## ETA DENTTETTIDAY AYBEE?

*Aassiyaageeti keehi koshshiyo biittan haggaaziyoo-gaa doommanawu qoppaanaadan nena aybi denttettidee?* Ha”i layttay 35 heera gidido **Eema, Amarkkaape** baasu. A, “Taani hara biitti baada haggaazanawu daro layttawu amottaas; shin heгаа mule oottana danddayennabada qoppaas” yaagaasu. I qofay laa-mettanaadan oottidabay aybee? “Beelizen haggaa-ziya issi azinayne machiyaa 2004n tana xegidi etaara issi aginaa aqinye gidada haggaazanaadan shoobidosona. Hegaadan oottaas; qassi hegaadan

haggaaziyoo-gaa keehi dosaas! Issi layttappe guyyi-yan, aqinye gidada haggaazanawu Gaana baas.”

Ha”i layttay 28 heera gidido, **Amarkkaappe** biida **Iste-faana**, amarida layttappe kase ba hanotaa loytaa yig-gada, ‘Taani payya; qassi maaddiyo so asi de’enna. Taani ha”i oottiyoogaappekka aaruwan Yihoowayyo oottana danddayays’ gaada qoppaasu. A ba hanotaa wozanappe qoridoogee Gaana baada loytaa haggaazanaadan o denttettiis. Layttay 60 heera gidido, **Denmarkken** de’iya **Filippanne Ayido**, giyo azinanne macho gidida aqinyeti aassiyaageeti keehi koshshi-yo biitti biidi haggaazanawu darotoo amottidosona. Eti bantta amoy waani polettanaakko qoppidosona. Filippi, “Hegaadan haggaazanaadan oottiyaabay merettin, Yihooway, ‘Doommite!’ yaagidabada qoppaas” yaagiis. Eti 2008n Gaana biidi heezzu layttap-pa dariya wodiya yan haggaazidosona.

Layttay 30 heera gidido **Hanzanne Bruko** giyo azinanne macho gidida aqinyeti, **Amarkkan** haggaa-zoosona. Kattrina giyo wolqqaama gotee 2005n



Erikanne Eemo



## Kare biitti baanaappe kase, hagaadan nena oycha:

- Taani tawunne ta soo asawu koshshiyaabaa kunttana danddayiayanaa?—1 Tas. 2:9.
- Taani he biittan de'ana danddayiyo piqaadiyaa woy vizaa demmana danddayiayanaa?
- He biittaa carckuwaa hanotaanne wogaa akeekidanaa?
- Ta payyatettawu maaddiyaabaa oottidanaa?
- Taani he biittaa qaalaa tamaanawu koyiyayanaa?
- Taani gubaa'iyaa 'daro maaddanawu' koyiyayanaa?—Gol. 4:11.

asaa qohi simmin, eti qohettidaageeta maaddiyo oosuwaa oottidosona. Takidi, kumetta sa'an keexxiyo oosuwaa oottanawu qitsiyaa kunttidosona; shin shoobettibookkona. Hanzi hagaadan giis: “Kawuwaa Daawiti beeta maqidasiyaa keexxana danddayennaagaa akeekido gishshawu, ba halchuwaa laammidoogaa qonccissiyaa haasayaa issi wode gita shiiquwan siyida. He qofay issi uri ayyaanaaban halchidobaa laammana danddayiyoogaa nuuni akeekanaadan maaddiis.” (1 Odi. 17:1-4, 11, 12; 22:5-11) Bruka qassi, “Yihooway nuuni hara kariyaa qoxxaanaadan koyiis” yaagaasu.

Hanzinne Bruka hara biittan haggazida bantta laggetuppe ufayssiyaa-baa siyi simmidi, hara biittan aqinye gididi haggaaazanawu koyidosona. Eti 2012n Gaana biidi, oyddu aginawu haggaaaziiddi malaata qaalaa gubaa'iyaa maaddidosona. Eti Amarkkaa simmidaba gidikkokka, Gaanan hegaadan haggaaazidoogee eti bantta de'uan Kawotettaabaa kaseyiyoogaa xoqqu oottidi xeellanaadan maaddiis. Hegaappe simmidi, eti Maykroneezhiyan macara biiruwaa keexxiyo oosuwana maaddidosona.

## HALCHIDOBAA POLANAWU BAAKETIDOSONA

Aassiyaageeti keehi koshshiyoo heeri baada haggaaazanawu waana giiget-tadii? Istefaana, “Aassiyaageeti keehi koshshiyoo biitti biidi haggaaaziyoogaa-baa yootiya huuphe yohota *Wochiyo Keelan nabbabaas*” yaagaasu.\* A gujjadakka hagaadan gaasu: “Taani hara biitti baada haggaaazana koyiyoogaa gubaa'e cimatuura, woradaa xomoosiyagaaranne a macheera haasayaas. He ubbaappe aaruwan, taani darotoo ta halchuwaabaa woosan Yihooway-yoo yootaas.” Qassi Istefaana ishala de'uwwa de'iyooogaa agganawu baaxetaasu; hegee a hara biittan haggaaaziyo wodi yawu miishshaa dagayanawu maaddiis.

Hanzi, “Yihooway nuna biite giyoosaa baanawu koyido gishshawu, i nuna maaddanaadan woossida. Nuuni baanawu halchido gallassaakka woosan ayyo yootida” yaagiis. Inne a machiyaa oyddu macara biiruwawu dab-

\* Leemisuwawu, “Aassiyaageeti Keehi Koshshiyoo Heeri Baada Haggaaazana Danddayay?” qassi “Maqidooniyaa Pinnada Maaddana Danddayay?” yaagiya huuphe yohota xeella.—*Wochiyo Keelaa* (Amaarattuwwa) Hospune 15nne Tisaase 15, 2009.





- 1 Brukonne Hanza
- 2 Aaroonanne Istefaano
- 3 Ayidonne Filippa
- 4 Adriyonne Jorja
- 5 Kiristtinonne Geedoona

ddaabbiyaa xaafidosona. Gaana macara biroy eta xeejin, eti naa"u aginaa yan takkanawu qoppidi biidosona. Hanzi, "Nuuni yan de'iya gubaa'iyara haggaa'ziyoogan keehi ufayttido gishshawu, nuuni qoppi-doo gaappe daro wodiyawu yan takkida" yaagiis.

Eta layttay 38 heera gidido **Kanaadappe** biida **Jor-janne Adriyo** giyo azinaynne machiyaa lo"obaa amottiyoogaa xalla gidennan, lo"obaa kuuyiyoogaa Yi-hooway anjjiyoogaa ubbatoo hassayoosona. Hegaa gishshawu, eti bantta halchuwaa polanawu oottana bessiyaabaa oottidosona. Eti Gaana baada haggaa'ziya michiyo daro oyshaa oychidosona. Qassi Kanaada macara biiruwawunne Gaana macara biiruwawu dabddaabbiyaa xaafidosona. Adriya, "Nuuni kaseegaappekka aaruwan ishala de'uwaa de'iyoo'gaa waani agganaakko qoppida" yaagaasu. Hegaadan kuuyidoo'gee eti 2004n Gaana baanaadan maaddiis.

## METUWAA GENCCIIYOOGAA

*Neeni yaa ba simmin metidabay aybee, qassi waana genccadii?* Eemo koyro heeran metidabay so asaa laamotaa. A, "Ubbabay kase taani meezetidobaappe dumma" yaagaasu. O maaddidabay aybee? A haggadan gaasu: "Nu soo asay ta haggaa'zuwaa keehi nashshiyoo'gaa dawalidi yootiyoogee taani he biitti baanawu kuuyidoy aybissakko ubba wode hassayanawu maaddiis. Guyyeppe nu soo asaara biiduwana haasayiyoo'gaa doommaas. Taani eta biiduwana be'iyoo gishshawu, etappe haakkada de'ennabada tawu siyettiis." Eema he biittaa asa gidida kayma mi-cheera laggetidoo'gee dumma dumma wogaa akeekanaadan o maaddiis. A gujjadukka yaagaasu: "Asay oottiyoobaa taani akeekanawu metootiyo wode, ta laggiiyaa taani ammanettiyoonne maaduwa' oychiyo ura gidaasu. A maaddido gishshawu, taani ay

oottanaakkonne ay ootennan aggana bessiyaakko akeekaas; hegee taani haggaazuwan keehi ufaytta-naadan maaddiis.”

Jorjinne Adriya Gaana biido koyro wode, etawu hanotay beni wodiyaagaa mala gidiis. Adriya hagaadan gaasu: “Nu maayuwa maashiniyan gidenan, balddiyan meeccoos. Qumaa kattiyoogee nu kase meezetoogaappe tammu kushe dariya wodiya keena ekkees. SHin amarida wodiyaappe guyyiyan, nuna metida hanotata nu de’uwan be’iyo oorattabandan xeellida.” Bruka qassi hagaadan gaasu: “Nuuni aqinye gididi haggaaziyo wode metiyaabay gakkishinkka, ufayssiya de’o de’oos. Nuuni nu de’uwan demmido ufayssiyaabaa ubbaa issippe gattiyaakko, issidiran shiishshido ciishshaadan lo”iya, keehi nashshidi ufayssan hassayiyo coraba gidana.”

## ANJJUWAA DEMISSIYA HAGGAZUWAA

*Haratikka hegaadan haggaazanaadan neeni minttetiyo aybissee?* Istefaana hagaadan gaasu: “Neeeni demmiyo asay ubbay tumaa siyanawu keehi koyiyo gishshawu, ubba galla nenaara Geeshsha Maxaafaa xanna’anawu koyiyo asay de’iyo heeran sabbakiyoo-gee keehi ufayssiyaaba. Aassiyaageeti keehi koshshiyoo heeran haggaazanawu biidoogee taani kuuyido keehi lo”obatuppe issuwaa!” Istefaana 2014n **Aaroon**a gelaasu; eti ha”i Gaana macara biiruwan oottoosona.

Ha”i layttay 32 heera gidido, **Jarmaneppe** biida **Kiristtina**, “Hegee keehi ufayssiyaaba” yaagaasu. Kiristtina Gaana baanaappe kase Bolivian haggaazaasu. A gujjada hagaadan gaasu: “Nu soo asaappe haakada de’iyo gishshawu, tana maaddanaadan ubba-too Yihoowakko woossays. I tawu awudeegaappenne aaruwan qoncce gidiiis. Qassi Yihoowa asaa giddon de’iya maalaalissiya issippetettaa akeekaas. Ha haggazoy ta de’uwan lo”obay kumanaadan oottiis.” Kiristtina mata wode **Geedoona** gelaasu; eti ha”ikka Gaanan haggaazoosona.

Filippinne Ayida Geeshsha Maxaafaa xanna’issiyoo-geeti ayyaanaaban diccanaadan eti waatiyaakko yootidosona. Eti, “Nuuni kase 15 woy hegaappe dariya asaa xanna’issoos; shin ha”i nu xinaateta loytti xanna’issanawu eta qooday 10ppe darenaadan kuu-

yida” yaagidosona. Tamaareti hegan go’ettidonaa? Filippi hagaadan giis: “Taani Mikaa’eela giyo yelagaa xanna’issaas. I ubba galla xanna’ana danddayiyo gishshawunne loytti giigettiyo gishshawu, *Geeshsha Maxaafay Tamaariissiyoy* giyo maxaafaa issi aginan wurssiis. Hegaappe simmin, Mikaa’eeli xammaqettennan aassiyaagaa gidiis. Haggaazanawu kiyido koyro gallassi i, ‘Ta xinaateta waata xanna’issanaakko maadduutee?’ giidi tana oychiis. Taani garametta-da a xeellaas. Mikaa’eeli heezzu xinaateta xanna’issiyoo-gaa doommidoogaanne waati xanna’issanaakko maaduwa koyiyoo-gaa yootiis.” Tamaariissiyaageeti ay keena koshshiyaakko, ubba xinaatetikka harata xanna’issiyoo-gaa qoppa!

Eema maadoy keehi koshshiyoo-gaa sohuwaara akekidoogaa hagaadan gaada yootaasu: “Gaana gakkosaara issi qeeri kataman sabbakiiddi, hayttay siyenna asata koyida. Nuuni hayttay siyenna issi ura xalla gidennan, hospun asata yan demmida!” Eema **Erika** gelaasu; eti dumma aqinye gididi haggaazoosona. Eti malaata qaala gubaa’iyaa maaddoosona; he biittan hayttay siyenna 300ppe dariya aassiyaageetinne tumaa eranawu koyiyo, hayttay siyenna haratikka de’oosona. Jorjinne Adriya Gaanan haggaaziidoogee misoonaawe gidanawu waatana bessiyaakko bantta de’uwan be’anaadan maaddiis. Hega gishshawu, eti Giiliyaade Timirtte Keettan 126tta kayan tamaranaadan shoobettido wode ay keena ufayttidonaashsha! Ha”i eti Moozambbiken misoonaawe gididi haggaazoosona.

## SIIQOY DENTTETIIS

He biittan de’iya ishaturanne michotuura cahaa oosuwaa minnidi oottiya, hara biittaappe biida keehi corata be’iyoo-gee daro ufaysses. (Yoh. 4:35) Gaanan saaminttan saaminttan amakaayiyen 120 asay xammaqettees. Aassiyaageeti keehi koshshiyoo-san haggaazanawu Gaana biida 17 ishaturugaadaaninne michotuugaadan, kumetta sa’an hegaadan haggaaziya haratikka Yihoowa siiqiyoo-gee eti bantta dosan ‘eeno gaanaadan’ denttettiis. Eti Kawotettaa mishiraachuwaa aassiyaageeti keehi koshshiyoo heeran haggaazoosona. Bantta dosan eeno giidi haggaaziya hega mala oosanchatun Yihooway ay keena ufayttiishsha! —Maz. 110:3; Lee. 27:11.



# Kawotettaa Koyappe Attin Aquwaa Koyoppa

*“Xoossaa kawotettaa koyite; i hegeeta intessi immana.”—LUQ. 12:31.*

DARO asay, asawu koshshiyaabay guutta, shin asay koyiyoo-  
bay qoodin wurena yaagees. Daroti asatettawu koshshiya-  
bay asay koyiyoobaappe aybin dummatiyaakko shaakki eren-  
nabaa milatees. Hegeeti dummatiyoy aybiinee? “Asatettawu  
koshshiyaabay” de’uwan nuussi keehi koshshiyaabaa. Leemis-  
wawu, qumay, maayoyne keettay nuussi keehi koshshees.  
Asay “koyiyoobay” de’uwawu keehi koshshana xayikkonne  
demmana koshshees giidi qoppiyoobaa.

<sup>2</sup> Asay koyiyoobay eti de’iyo heeraa hanotaadan dummata-  
na danddayees. Hiyyeesa biittan de’iya daroti moobayliyaa,  
motoriyaa, woy biittaa shammanawu gidiya miishshay de-  
anaadan koyana danddayoosona. Dure biittan de’iyaageeti  
keehi al’o maayuwaa, keettaa, woy kaamiyaa shammanawu  
amottana danddayoosona. Ay gidinkka, miishshaa siiqiyoo-  
gee, nuussi koshshiyaaba gidin aggin, woy qassi shammanawu

1. Asatettan nuussi koshshiyaabay nuuni koyiyoobaappe aybin dummatii?
2. Asay koyiyo issi issibay aybee?

MAZAMURE: 40, 44

## NE QOFAY AYBEE?

Asatettan nuussi koshshi-  
yaabay nuuni koyiyoobaappe  
aybin dummatii?

Daro aquwaa shiishshanawu  
amottennaadan nuuni naa-  
gettana koshshiyoy aybissee?

Hachi hachi koshshiyaabaa  
Yihooway immanaagaa am-  
manettiyooy aybissee?

danddayin aggin darobaa koyiyoogee kee-  
hi qohees.

### MIISHSHAA SIIQIYO PIRIYAN GELENNAADAN NAAGETTA

<sup>3</sup> Miishshaa siiqiyoogee aybee? Hegee ay-  
yaanaabaappe aattidi miishshaabaa qop-  
piyoogaa giyoogaa. Miishshaa siiqiyoogee  
issi uri amottiyoobaara, kaseyiyoobaaran-  
ne ba de'uwani xoxqu oottidi xeelliyoo-  
baara gayttidaba. Hegee nuuni daro aqo-  
taa shiishshanawu amottanaadan oottees.  
Miishshaa siiqiya uri dure gidennan agga-  
na, woy kee hi al'obaa shammennan aggana  
danddayees. Hiyyeesatikka miishshaa sii-  
qananne Kawotettaa kaseyiyoogaa aggana  
danddayoosona.—Ibr. 13:5.

<sup>4</sup> Nuuni nu de'uwani kee hi ufayttidi de'a-  
nawu miishshay nuussi kee hi koshshiyaa-  
badan qoppaanaan oottanawu Seexaa-  
nay ha alamiyaa zal'e dirijjiteti go'ettes.  
I 'ayfen xeellin qaaqqayiyaabaa' ootti-  
yoogan qara. (1 Yoh. 2:15-17; Doo. 3:6;  
Lee. 27:20) Ooratti merettidabaa sham-  
manaadan nuna ammantanawu erissi-  
yoobaa darotoo ha alamiyan be'os woy  
siyoos. Issibay neessi kee hi koshshana xa-  
yikkonne, erissuwan woy suuqiyan be'a-  
da kee hi dosido gishshawu shamma eray?  
Hegaa shamma simmada i baynnan de'a-  
na danddayiyoogaa guyyeeppe akeekadii?  
Aynne koshshenna hegaa malabay nu-  
ni de'uwani un'ettanaadan oottees. Hegee  
Geeshshaa Maxaafaa xanna'iyooogaa, shii-  
quwawu giigetidi biyoogaanne ubbatoo  
haggaaziyoogaa mala ayyaanaabaa oosu-  
waappe nu qofaa wora zaaridi nuuyyo  
pire gidana danddayees. Yohaannisi, "Ha  
sa7ainne ha sa7an asi amottiyo ubbabai

3. Miishshaa siiqiyoogee aybee?

4. 'Ayfen xeellidi qaaqqatiyoobaa' Seexaanay  
waati go'ettii?

aadhdhana" yaagidi zoridoogaa hassaya.

<sup>5</sup> Nuuni Yihoowawu haarettiyoogaa ag-  
gidi miishshawu haarettanaadan Seexaa-  
nay koyees. (Maa. 6:24) SHin, nuuni daro-  
baa demmanaagaa xallaa qoppikko, nu  
de'uwani ufayttokko. Hidootaa qanxxana  
woy miishshan metootana danddayoos.  
Woy ixxi iitidi Yihoowaaninne a Kawotet-  
tan ammaniyoogaa aggana danddayoos.  
(1 Xim. 6:9, 10; Ajj. 3:17) Hagee zeri-  
yaagaa leemisuwan Yesuusi yootidoobaara  
issi mala. Kawotettaa mishiraachoy 'agun-  
ta giddon zerettiyo' wode, "harabaa amot-  
tiyoogee eta wozanan gelidi, qaala cuul-  
lees; cuullin aifennan atti aggees."—Mar.  
4:14, 18, 19.

<sup>6</sup> Ermmaasa xaafiyaa Baarukabaa qoppa.  
Kasetidi odettida Yerusalaame xayoy ma-  
tin, Baaruki kee hi koshshenna 'gitabaa ko-  
yiyoogaa' doommiis. SHin, Yihooway ayyo,  
"Nena haiquwaappe ashshana" yaagidoo-  
gaa xallaa demmanawu i hidootan naagana  
koshshees. (Erm. 45:1-5) Xayiya he kata-  
maappe o aquwaanne Xoossay ashshen-  
naagee qoncce. (Erm. 20:5) Ha alamiyaa  
xayoy mati mati biyo ha wodee nuuni daro  
aquwaa shiishshiyoo wode gidenna. Nuuyyo  
de'iyaaabay ay keena al'o gidikkonne, gita  
waayiyaa wode hegee nunaara attana giidi  
qoppa koshshenna.—Lee. 11:4; Maa. 24:  
21, 22; Luq. 12:15.

<sup>7</sup> Yesuusi nuuni miishshaa siiqidi woy  
koshshennabawu hirggidi wora simmen-  
nan, de'uwawu koshshiyaaabaa kuntu-  
ttiyo lo'o zoriyaa yootiis. Deriyaa Bolla Timir-  
ttiyan i he zoriyaa yootiis. (Maa. 6:19-21)  
Ane he timirttiyaappe Maatiyoosa 6:25-  
34n de'iyaaagaa nabbabidi pilggoos. Yaati-

5. Darobaa demmana giidi daro wolqqaa wurssi-  
yaageeti waaniyoona?

6. Baaruka hanotaappe ay tamaariyoo?

7. Nuuni kaallidi be'anabay aybee, qassi aybissi?



yoogee nuuni *aquwaa* gidennan, ‘Kawotet-taa koyana’ bessiyooгаа ammananaadan oottana bessees.—Luq. 12:31.

#### ASATETTAN NUUSSI KOSHSHIYAABAA YIHOOWAY KUNTTES

<sup>8</sup> **Maatiyoosa 6:25 nabbaba.** Yesuusi i yootiyoobaa siyiyaageeti ‘de’uwawu hir-ggennaadan’ odidoogee “hirggiyoogaa ag-ganaadan” yootiyoogaara issi mala. Eti hirggana koshshennabawu hirggoosona. Yesuusi etawu qoppidi eti hegawu hirggi-yoogaa agganaadan yootiis. Koshshiyaa-bawukka gidin coo hirggiyoogee, issi ura qofay shaahettanaadaaninne i keehi kosh-shiya ayyaanaabaa qoppiyoogaa agganaa-dan oottana danddayees. Yesuusi deriyaa bolla tamarissiyo wode, ba erissiyo ash-kkaratussi keehi qoppiyo gishshawu, he qohiya qofaappe naagettanaadan hegaap-pe hara oyddutoo zoriis.—Maa. 6:27, 28, 31, 34.

<sup>9</sup> Yesuusi nuuni miyoobawu, uyiyooba-wu woy maayiyoobawu hirggennaadan yootidoy aybissee? Hageeti nu de’uwawu keehi koshshiyaabata gidokkonaa? Ee, gi-diyoogee tuma! Hegeeta demmana xayiko, nuuni hirggiyoogee attii? Hirggiyoogee antenna; qassi heгаа Yesuusikka erees. Asawu hachi hachi koshshiyaabaa i loy-tti erees. Hegaappekka aaruwan, ‘wayssi-ya wode’ geetettida ‘wurssetta gallassan’ bana kaalliyaaageeta daro wodeppe guyyi-yan gakkana metuwaa i erees. (2 Xim. 3:1) Daro asay oosuwaa demmanawu metooti-yoogee, etawu ubbay keehi al’iyoogee, kattay xayiyooeenne eti manqqiyoogee hegeetuppe amaridaageeta. SHin Yesuusi ‘shemppoy qumappe, qassi bollay maayoppe aadhiyoogaa’ erees.

8, 9. (a) Nuussi koshshiyaabawu keehi hirggana bessennay aybissee? (b) Asaabaanne etawu kosh-shiyaabaa xeelliyaaagan Yesuusi eriyoobay aybee?

<sup>10</sup> Yesuusi he timirttiyaa tamarissiiddi ezggiyaageeti, “Hachchi hachchi koshshi-ya qumaa nuuyyo hachchi imma” giidi, banttawu asatettan koshshiyaabaa imma-naadan saluwan de’iya bantta Aawaa oy-chana mala hegaappe kase yootiis. (Maa. 6:11) Hara wodekka, Yesuusi eti galla galla banttassi koshshiyaabawu woossanaadan zaarettidi odiis. (Luq. 11:3) SHin hegee nuuni nuuyyo asatettan koshshiyaabaa ub-batoo qoppana bessees giyoogaa gidenna. Yesuusi Xoossaa Kawotettay yaanaadan woossiyooгаа he woosan sinttayanaadan yootiis. (Maa. 6:10; Luq. 11:2) Yesuusi Yihooway ba meretatu ubbaayyo kosh-shiyaabaa waati kunttiyaakko yootidi, ba erissiyo ashkharati hirggiyoogaa agganaa-dan minttettiis.

<sup>11</sup> **Maatiyoosa 6:26 nabbaba.** Nuuni tishshi oottidi ‘kafota xeellana’ koshshees. He meretati guutta gidikkonne, mittaa ay-fiyaa, kattaa, guxuniyaa woy heгаа ma-labaa daro moosona. Miyoobaa bollaara gatti xeelliyo wode, etaagee asaagaap-pe daro. SHin eti miyoobaa demmanawu biittaa goyidi zerokkona. Yihooway etawu koshshiya ubbabaa immees. (Maz. 147:9) I eta qumaa barsennaagee tuma! Miyo da-robay de’ikkonne, eti biidi demmana kosh-shees.

<sup>12</sup> Yesuusi ba Aaway kafotussi kosh-shiyaabaa immiyaaba gidikko, asawuk-ka hegaadan immanaagaa mule sireenna.<sup>[1]</sup> (1 PHe. 5:6, 7) I nuna qumaa barsennaba gidikkokka, koshshiya qumaa demmana-wu woy shammanawu nuuni oottiyoobaa

10. Yesuusi bana kaalliyaaageeti woygi woossa-naakko tamarissiyo wode, eta de’uwan ay kaseya-na bessiyooгаа yootidee?

11, 12. Yihooway kafotuyyo koshshiyaabaa kuntti-yo ogiyaappe ay tamariyoo? (Doomettan de’iya misiliyaa xeella.)



Kawotettaabaa loytta qoppanawu ne de'uwan issi issibaa aggabayuutee? (Mentto 20 xeella)

## De'uwan Issi Issibaa Aggabaiyoogaa

1. Neeyyo tumuppe koshshiyaabaa shaakka era
2. Koshshennabawu miishshaa kessoppa
3. Demmiyoobaappe kessana danddayiyo miishshaa mazggafa\*
4. Neeni go'ettennaabaa digga
5. Neeni acotidobaa zaara
6. Oottiyo issi issibaa aggabaya
7. Kaseegaappe aaruwan waata haggazanaakko halcha

\* Isiine 2010 *Beegottite!* maxeetiyaa sinttaa 8n de'ya, "Demmiyoobaappe Kessana Danddayiyo Miishshaa Mazggafaiyoogaa" giyo saaxiniyaa xeella.

anjjees. Nuuni metootiyo wode, harati banttawu de'yaabaappe nuussi shaakki immanaadan eta denttettana danddayees. Yihooway kafotussi keettaa immanaagaa Yesuusi yootana xayikkonne, eti banttawu keettaa keexxanaadan etawu eraanne hegawu maaddiyaabaa immiis. Hegaadanka, Yihooway nu soo asawu haniya keettaa nuuni demmanaadan maaddana danddayees.

<sup>13</sup> Yesuusi i yootiyoobaa ezggiyaageeta, "Intte [kafotuppe] keehi aadhdhekketii?" yaagidi oychiis. Yesuusi he wode matan ba shemppuwaa asawu aattidi immanaagaa qoppiyoogee qoncce. (Luqaasa 12:6, 7a gatta xeella.) Yihooway Kiristoosa wozuwaa yarshshuwaa asaassappe attin hara ay meretassikka immibeenna. Yesuusi nuuni

13. Nuuni kafotuppe keehi aadhiyoogaa bessiyaa-bay aybee?

merinaa de'uwaa demmanaadan nu gishshawu hayqqiisippe attin, kafotussi hayqqibeenna.—Maa. 20:28.

<sup>14</sup> **Maatiyoosa 6:27 nabbaba.** Hirggiya uri ba geesaa woy bariyaa bolli issi warakka gujjana danddayennaagaa Yesuusi yootidoy aybisee? Hachi hachi nuussi koshshiyaabawu coo mela hirggiyoogee nu bariyaa adussenna gishshataassa. Keehi hirggiyoogee ubba nu bariyaa qanttana danddayees.

<sup>15</sup> **Maatiyoosa 6:28-30 nabbaba.** Haggaaaziyo wode, gubaa'e shiiquwaa woy gita shiiquwaa shiiqiyo wode lo'iya maayuwaa maaiyoogaa dosoos. SHin, nuuni 'maa-

14. Hirggiya uri waatana danddayennee?

15, 16. (a) Yihooway ciishshaa mayzziyo ogi-yaappe ay tamarana danddayiyo? (Doomettan de'ya misiliyaa xeella.) (b) Nuna woygidi oyhana bessii, qassi aybissi?



yossi hirggana' bessii? Yesuusi zaarettidikka nuuni Yihooway medhidobaa qoppaanaadan yootiis. I yootidobay 'dembban de'iya ciishshatu' meraappe nuuni darobaa akeekanaadan maaddes. Yesuusi keehi lo'iya ciishshaabaa qoppennan waayi aggana. Ciishshay maayanawu puutto suqqenna, sikkenna woy daddenna. SHin keehi lo'ees! Ubba, "harai atto, Solomoni heгаа keena bonchchettidaagaa gidiiddi, he ciishshatuppe issuwaagaa malaa maayi-beenna"!

<sup>16</sup> Yesuusi, "Laafa ammanoi de7iyoogetoo, Xoossai, . . . dembbaa maataa maizziyaagee, inttena etaagaappe aattidi waati maizzennee?" yaagidoogaa akeeka. I mayzziyoogee qoncce! SHin, Yesuusa kaalliyaagetuyyo ammanoy pacciis. (Maa. 8:26; 14:31; 16:8; 17:20) Eti kasegaappe aaruwan ammanuwan minnananne Yihooway

wan ammanettana koshshees. Nuuni shin? Nuussi koshshiyaabaa kunttanawu Yihooway koyiyoogaanne danddayiyoogaa xeeliyaagan nu ammanoy ay keena minoo?

<sup>17</sup> **Maatiyoosa 6:31, 32 nabbaba.** Kawotettaabaa bantta de'uan kaseyiyaageetuyyo wozanappe qoppiya, saluwan de'iya siiqiya nu Aawan ammanettennanne 'a ammanenna' asatu mala gidana koyokko. 'Xoossaa ammanennaageeti darissidi koyiyo ubbabaa' shiishshanawu baaxetiyoogee Yihoowaara nu dabbotay mooretanaadan oottana danddayees. Nu de'uan ayyaanaabaa kaseyiyoogan nuuppe koyettiyaabaa oottikko, Yihooway nuuyo lo'obaa diggennaagaa ubbatoo ammanettoos. "Xoossaa milatiyoogee" "miyoobainne maayiyoobai" nuussi gidana

17. Yihoowaara nu dabbotay mooretanaadan oottana danddayiyaabay aybee?

giidi de'anaadan denttettana koshshees.  
—1 Xim. 6:6-8.

### NE DE'UWAN XOSSAA KAWOTETTA KASEYAY?

**18 Maatiyoosa 6:33 nabbaba.** Kiristoosa kaalliyaageeti ubbato bantta de'uan Kawotettaabaa kaseyana bessees. Nuuni yaatiyaabaa gidikko, Yesuusi yoodoogaadan 'ubbabay nuussi imettana.' I hegaadan giidoy aybissee? Hegaappe kasetiya payduwan i, "He ubbai intena koshshiyooгаа saluwan de'7iya intte Aawai erees" yaagiis; he ubbabay geetettidabay nu de'uwan koshshiyaabaa. Nuussi koshshiya qumaa, maayuwaanne keettaa malabaa nuuni qoppaanaappe kasekka Yihoo-way erees. (Pili. 4:19) Nu maayuwaappe koyro wuranay awugaakko i erees. I nuuni maana koshshiyaabaa, qassi nu so asawu de'yoosay koshshiyooгаа erees. Yihooway tumuppe nuussi *koshshiyaabaa* nuuni demanaadan oottees.

**19 Maatiyoosa 6:34 nabbaba.** Yesuusi zaarettidikka "hirggoppite" giidoogaa akeeka. Nuuni Yihooway maaddanaagaa ammanettidi hachiigaa xallaa qoppaanaadan Yesuusi koyees. Issi uri sinttappe aybi hanaanee giidi coo hirggikko, Xoossan ammanettiyoogaappe banan ammanettes; hegee qassi Yihoowaara a dabbotay moorettanaadan oottana danddayees. —Lee. 3:5, 6; Pili. 4:6, 7.

### KAWOTETTAABAA KASEYIKKO YIHOOWAY KOSHSHIYAABAA KUNTTANA

**20** Nuuni daro aquwaa shiishshanawu Kawotettaabaa kaseyennan aggikko, hegee

18. Yihooway nubaa ay erii, qassi i nuussi waatii?

19. Sinttappe aybi hananee giidi nuuni hirggana bessennay aybissee?

20. (a) Neeni ayyaanaabaa oosuwan halchana danddayiobay aybee? (b) Ne de'uan issi issibaa aggabayawanawu waatana danddayay?

azzanttiyaaba. Yaaniyoogaappe, nuuni ayyaanaabaa halchana bessees. Leemisuwawu, Kawotettaabaa aassiyaageeti keehi koshshiyoo gubaa'iyaa baada haggazana danddayay? Aqinye gidana danddayay? Neeni aqinye gidikko, Kawotettaa Mishiraachuwa Yootiyaageetu Timirtte Keetan tamaanawu qoppay? Saaminttaappe amarida gallassaa Beeteelen woy xuufiyaa birshshiyoo biiruwan oottiyoogan maaddana danddayay? Kawotettaa Addaraashaa keexxiyoogan intte heeran amarida gallassaa maaddana danddayay? Kawotettaa oosuwa loytta oottana mala ne de'uan aggabayana danddayiobaa qoppa. Woossa, qassi "De'uan Issi Issibaa Aggibaiyoogaa" giyo saaxiniyan de'iya qofaa xanna'ada, ne halchuwa polanawu maaddiyaabaa ootta.

**21** Nuuni Kawotettaabaappe attin aquwaabaa kaseyennaadan Yesuusi tamarisidoogee bessiyaaba. Yaatikko, asatettan nuussi *koshshiyabawu* mule hirggokko. Yihooway nuna maaddiyoogaa ammanettiyo gishshawu, kaseegaappe aaruwan akko shiiqoos. Nu shammana danddayikkokka, amottiyo ubbaba woy alamee giigissiyo ubbaba shammokko. Nu de'uan issi issibaa ha'i aggibaiyoogee nuuni sinttappe yaana "tumu de'uwaa" mintti oyqqanaadan maaddes.—1 Xim. 6:19.

21. Neeni kaseegaappe aaruwan Yihoowakko shiiqanaadan aybi maaddana danddayii?

### WURSSSEETA QOFAA

[1] (mentto 12) Yihooway issi Kiristaaniyaa issi issitoo namisay caddanaadan paqqadiyoy aybissakko eranawu Masqqala 15, 2014, *Wochiyo Keelaa*, sinttaa 22n de'iya "Nabbabiyaageetu Oyshaa" xeella.



# Nuuni ‘Naagi Uttana’ Bessiyoy Aybissee?

“*Intte Godai ai gallassi yaanaakkonne intte [erekketa].*”—MAA. 24:42.

GITA shiiqoy doommanna hanees. Liqambbaree madirakiyaa kiyidi, shiiqida asaa mokkees. Muuziqay doommanna hanees. SHiiqida asay he wode uttana koshshiyooqaa erees. Eti keehi ufayssiya muuziqaa siyanawu koyidosona; qassi hegaappe simmin siyana haasayata yeemottidi naagoosona. SHin issi issi asay yaa haa hemettiyo gishshawu woy ba laggiyaara haasayiyogishshawu, eta qofay shaahettin prograamee doommidoogaa akeekana xayikko shin? Eti he saatiyaanne he wode haniyaabaa, hegeekka, liqambbaree madirakiyaa kiyidoogaa, muuziqay siyettiyoogaanne asay uttidoogaa akeekibookkana. Keehi matida gitabaa nuuni naagi uttana koshshiyooqaa akeekanaadan he hanotay maaddana danddayees. He gitabay aybee?

<sup>2</sup> Yesuusi ‘wodiya wurssettaabaa’ yootiiddi ba erissiyashkharati ‘he wodee awude gidanaakko eti erenna

1. Wodee awudekko, qassi nu yuushuwan haniyaabay aybakko aybissi akeekana koshshiyaakko leemisuwan yoota. (Doomettan de’iya misiliyaa xeella.)

2. Yesuusi ba erissiyashkharati ‘naagi uttanaadan’ yootidoy aybissee?

MAZAMURE: 136, 54

**WAANI NAAGI UTTANA  
DANDDAYIYOO?**

Dabloosa qohoy de’ishin

Alamiyaa ayyaanay de’ishin

Nu balay de’ishin

gishshawu naagettanaadan' zoriis. He-gaappe simmin, zaaretti zaarettidikka Yesuusi 'minnaanaan' woy *naagi uttanaadan* zoriis. (Maa. 24:3; **Marqoosa 13:32-37 nabbaba.**) Yesuusi ba erissiyo ashkharati beegotti uttanaadan yootidoogaakka Maatiyoosi he taarikiyaa xaafiyo wode qonccissiis. Yesuusi hagaadan giis: "Intte Godai ai gallassi yaanaakkonne intte erenna gishshau, *naagi uttite*. . . Inttekka giigi uttite; aissi giikko, taani, Asa Na7ai, intte qoppenna saatiyan yaana." I zaarettidikka, "Simmi taani, Asa Na7ai, yaana gallassaa woi saatiyaa intte erenna gishshau, *naagi uttite*" yaagiis.—Maa. 24:42-44; 25:13.

<sup>3</sup> Nuuni Yihoowa Markka gidiyo gishshawu, Yesuusi zoridobaa nu wozanan wotoots. Nuuni "wurssettaa wodee" wuranawu matidonne "iita waayee" doommana haniyo wodiyan de'iyoojaa eroos! (Dane. 12:4; Maa. 24:21) Olay, shori baynna kanddoynne makkalay yaa gujjiyoogee, haymaanootiyan asaa balettiyoogee, kattay qaxuhatiyoogee, wurssiya harggeenne biittaa qaattay kumetta sa'aa gakkidoogaa akeekoos. Qassi, Yihoowa asay ubbasan Kawotettaa mishiraachuwaa yootiyoogaa eroos. (Maa. 24:7, 11, 12, 14; Luq. 21:11) Goday yiyo wode nu go'awunne Xoossaa halchuwaa polanawu i oottanabaa yeemotitidi naagoos.—Mar. 13:26, 27.

#### HE GALLASSAY KEEHI MATIIS!

<sup>4</sup> Gita shiiquwaa bakkay ubbay doommiyo saatiyaa eroos. Gidikkokka, nuuni ay keena baaxetikkonne, gita waayee

3. Yesuusa zoriyaa nu wozanan wottiyoy aybissee?

4. (a) Armmageedoona olay awude danddanaakko Yesuusi ha"i erees gaana danddayiyoy aybissee? (b) Nuuni gita waayee awude doommanaakko erana xayikkonne, ay ammanettana danddayiyoo?

doommiyo layttaa woy gallassanne saatiyaa shaakki erana danddayokko. Yesuusi sa'an de'iyoo wode, "He gallassanne he saatiyaa Aawaa xalaalaappe attin, harai atto saluwan de7iya kiitanchchata gidin, woi tana Na7aa gidinkka ooninne eriyaabi baawa" yaagiis. (Maa. 24:36) SHin Kiristtoosayyo Seexaanaa alamiyaa xayssiyo maata y imettiis. (Ajj. 19:11-16) Hegaa gishshawu, Armmageedoona olay awude doommanaakko Yesuusi ha"i erees giidi qoppa danddayoos. SHin, nuuni erokko. Gita waayee doommana gakkanaassi nuuni beegottidi de'ana bessees. SHin Yihooway hegee polettana wodiyaawudekka erees. Gita waayee doommana wodiyaaw i keeri wottiis. He gallassay mati mati bees, qassi "gam77enna." (**Imbbaaqooma 2:1-3 nabbaba.**) Nuuni hegaa ammanettiyooy aybissee?

<sup>5</sup> Yihooway hanana giidobay awudekka gidin i keerido wodiyan polettiis! I Israa'eelata Gibxxeppe kessiyo wode ba giido wodiyan waati kessidaakko qoppa. Niisaana 14, 1513 K.K. xeelliyagan Muusee, "He oiddu xeetanne hastamu laittai wuriyo *he* wurssetta *gallasan*, GODAA asai ubbai Gibxxe biittaaappe kiyiis" yaagiis. (Kes. 12:40-42) Yihooway Abrahaamaara maacetitido maachaara gayttidabay haniyoogaa doommido 1943n K.K., he "oiddu xeetanne hastamu laittai" doommiis. (Gal. 3:17, 18) Amarida wodiyaappe guyyiyan, Yihooway Abrahaama, "Ne zeretta i hara biittan bete gididi de7anaagaa neeni tumuppe era; eti ailletidi oiddu xeetu laittata naaqaattana" yaagiis. (Doo. 15:13; Oos. 7:6) He naaqaattido 'oyddu xeetu layttay' Yisaaqi xanttaa duuxxido gallassi Isimaa'

5. Yihooway hanana giidobay awudekka gidin i keerido wodiyan polettiyoogaa bessiya leemisuwaa yoota.

eeli a qoosido 1913n K.K. doommidoogee qoncce; qassi Israa'eelati 1513n K.K. Gib-xeppe kiyiyo wode he 400 layttay wuriis. (Doo. 21:8-10; Gal. 4:22-29) Ee, Yihooway ba asaa ayillettaappe kessana wodiya 400 layttappe kase keeri wottiis!

<sup>6</sup> Gibxxe ayillettaappe kiyida Yaasu Israa'eelata hagaadan giis: "GODAI intte Xoossai intteyyo immana giido lo77o ubbaappe issibinne attibeennaagaa intte ubbai intte wozanaaninne shemppuwan ereeta. I intteyyo immana giidobaappe issibinne attennan, ubbai polettiis." (Yaas. 23:2, 14) Yihooway gita waayiyaappe nuna ashshanawu gelido qaalaykka polettennan attennaagaa ammanettoos. Gidoppe attin, ha alamee xayiyiyo wode attanawu nuuni naagi uttana bessees.

#### ATTANAWU NAAGI UTTANA KOSHSHEES

<sup>7</sup> Naagi uttana koshsiyooqaa beni wode hanidabaappe tamaroos. Beni, Yerusaalaama mala gita katamati adussa gimbbiyani darettoosona. He dirssay olanawu yiya asaappe attanawunne yuushuwan de'iyaa biittaa xoqqa sohuwaappe be'anawu maaddees. Naagiyaageeti dirssaa bollinne penggiyaa matan uttidi qamminne gallassi naagoosona. Eti kataman de'iyaaageeti qohiya aybipenne naagettanaadan kasetidi odoosona. (Isi. 62:6) Naagiyaageeti bantta sohuwan uttidi beegottidi naagana bessees; hankkoode daro asay hayqqana dandayees.—Hiz. 33:6.

<sup>8</sup> Taarikiyaa erancha gidida Ayhuda bitanee Josefesi penggiyaa naagiyaageeti xis-

---

6. Yihooway ba asaa ashshanaagaa nuuni ammanettana danddayiyoy aybissee?

7, 8. (a) Beni, naagiyaageeti ay oottiyoonaa, qassi hegaappe nuuni ay tamariyoo? (b) Naagiyaageeti xiskkiyoogee kaalettiyoobaa bessiya leemisuwaa yoota.

kkido gishshawu 70 M.Ln Rooma wotaadarati Yerusaalaame dirssaa miyyiyan de'iyaa Antooniyaa Gimbbiyaa oyqqidoogaa xaa-fiis. Wotaaddarati he sohuwaappe biidi beeta maqidasiyaa tamaa oyttido wode, Yerusaalaameeninne Ayhuda biittan hani erenna gita waayee polettiis.

<sup>9</sup> Ha wodiyan daro biittati wotaaddaratun woy zammaana miishshaa go'ettidi bantta zawaa naagissoosona. Eti qohanawu zawaa kanttiyaanne biittaa shabbirana danddayiya morkkiyaa naagoosona. SHin eti akeekana danddayiyoobay hara kawotettati woy asi qohanawu oottiyooqaa xalaala. Eti Kiristoosi Kawo gidido Xoossaa Kawotettay saluwan de'iyooqakka matan kawotettata ubbaa xayssanawu oottana-baa gujgin, he kawotettay oottiyooqakka akeekokkona. (Isi. 9:6, 7; Dane. 2:44) SHin nuuni ayyaanaaban ubbato beegottidi de'iyooqan, he pirddaa gallassay awude gakkikkonne giigettidi naagoos.—Maz. 130:6.

#### BEEGOTTA UTTENNAADAN OOTTIYAABAAPPE NAAGETTA

<sup>10</sup> Kumetta qammaa xiskkennan naagiiddi aqida uraaba qoppa. I naagiyo saatee wuranawu matiyo wode keehi daafuridi xiskkuwaa gophattees. Hegaadankka, ha alamiyaa xayoy matiyo wode beegotti naagiyoogee nuna keehi metana. Nuuni he wode naagi uttana xayikko, hegee keehi azzanttiyaaba! Nuuni minnana xayikko, naagi uttennaadan oottana danddayiya heezubaa ane be'oos.

<sup>11</sup> ***Dabloosi asay ayyaanaabaa koyennaadan oottiiddi de'ees.*** "Ha sa7aa

---

9. Ha wodiyan daro asay akeekennabay aybee?

10, 11. (a) Nuuni naagettana bessiyaabay aybee, qassi aybissi? (b) Dabloosi asay Geeshsha Maxaafaa hiraagaa siyennaadan oottidoogaa neeni amaniiyoy aybissee?



Ayyaanaaban beegottada de'anawu neeyyo danddayettida ubbabaa oottay? (Mentto 11-16 xeella)

haariyaagee” a. Yesuusi hayqqanaappe guuttaa kasetidi ba erissiyo ashkkaarussi heezzutoo hegaa yootiis. (Yoh. 12:31; 14:30; 16:11) Asay Xoossay yootido hiraaga ubban odettidaagaadan beegotti naagenna mala Dabloosi eta wozanaa jallissanaagaa Yesuusi erees. (Sof. 1:14) Seexaanay alamiyan de'iya worddo haymaanoonetu timirttiyan asaa qofaa goozees. Neeni haratuura haasayiyo wode akeekidobay aybee? Asay ha alamee xayanaaganne Kiristtoosi Xoossaa Kawotettan haariiddi de'iyooгаа akeekennaadan, Dabloosi 'ammanenna asatu qofaa jallissidooгаа' akeekabeykkii? (2 Qor. 4:3-6) Ha alamiyaa wurssettaabaa nuuni yootiyo wode daro asay eranawu koyenna; eti ubba, “Siyanawu koyikke” goosona.

<sup>12</sup> Harati siyanawu koyenna gishshawu hidootta qanxxada beegottada naagiyoogaa aggoppa. Naagi uttana koshshiyooгаа neeni eraasa. PHawuloosi ba mala Kiristtaaneti Yihoowa 'gallassay yaanaagaa loyyti eriyooгаа' etassi yootiis. I he gallassay 'kaysoy qammi yiyoogaadan' yaanaa-

12. Nuuni Dabloosi cimmiyooban cimettana koshshennay aybissee?

gaakka yootiis. (**1 Tasalonqqe 5:1-6 nabbaba.**) Yesuusi, “Taani Asa Na7ai, intte qoppenna wodiyan yaana gishshau, intteka qassi giigi uttanau bessees” yaagidi nuna zoriis. (Luq. 12:39, 40) Matan, “Ubbabai saro; aibikka hanenna” giidi asay worddobaa ammananaadan Seexaanay cimmana. Alamiyan ubbabay saro giidi qoppanaadan i eta balettana. Nuuni shin? Nuuni 'beegottidi woga de'ikko,' qoppennan sa'ay wonttiyo 'kaysuwaagaadan' he pirddaa gallassay nuuni qoppennan gakkenna. Nuuni galla galla Xoossaa Qaalaa nabbabananne Yihooway nuuyyo yootiyoobaa wotti dentti qoppana koshshiyoy hegaassa.

<sup>13</sup> **Alamiyaa ayyaanay ayyaanaaban xiskkuwaa yeddees.** Daroti darin koshshennabawu bichaariyo gishshawu, 'ayyaanaaban hiyyeesa gidiyooгаа' akeekokkonna. (Maa. 5:3) Eti 'asatettaa amoyenne ayfen xeellidi qaaqqatiyoogee' yaa daranaadan oottiya ha alamiyaa aquwaabaa xallaa qoppoosona. (1 Yoh. 2:16) Wodiya aattiyoo-

13. Ha alamiyaa ayyaanay asaa waati qohiiddi de'ii, qassi he qohiyaabaappe nuuni waani naagetana danddayiyo?



baykka asay ‘ufaittiyoobaa dosanaadan’ oottiyaaban kumiis; qassi layttappe layttan he paacciyaabay yaa gujjees. (2 Xim. 3:4) PHawuloosi Kiristtaaneti ‘bantta asatettaa amuwaa polanawu qoppennaadan’ zoridoy hegaassa; hegee ayyaanaaban xiskuwa yeddees.—Roo. 13:11-14.

<sup>14</sup> Nuuni matan hananabaa loytti akekanaadan Yihooway a baggaara maaddido Xoossaa ayyaanaa kaaletuwaa kaalloosippe attin, ha alamiyaa ayyaanaa kaallokko.<sup>[1]</sup> (1 Qor. 2:12) SHin nuuni naagettana bessees. Nuuni galla galla oottiyoobaykka ayyaanaaban xiskuwa yeddana danddayees. (**Luqaasa 21:34, 35 nabbaba.**) Nuuni naagi uttiyo gishshawu harati nu bolli qilliiccana danddayoosona; shin hegee nuuni naagi uttennaadan oottana koshshenna. (2 PHe. 3:3-7) Nuuni Xoossaa ayyaanaa demmiyo gubaa’e shiiquwaa nu mala Kiristtaanetuura ubbatoo shiiqana bessees.

<sup>15</sup> ***Nu nagarancha ashoy nuuni beegotti de’anawu murtidoogaadan minnenaadan oottana danddayees.*** Ashuwaa bala qofay nagarancha asaa xooniyoogaa Yesuusi erees. Yesuusi hayqqanaappe kasetiya qammi hanidabaa qoppa. I Xoossawu ammanettidi de’anawu minnana mala, saluwan de’iya ba Aawaa woossana koshshiis. Yesuusi i woossishin PHeexiroosi, Yaaqoobinne Yohaannisi ‘naaganaadan’ yootiis. SHin eti gakkabay ay keena wolqqaambaakko akeekibookkona. Eti bantta Godaa naagiyoogaa aggidi, bantta ashuwaa koshshaa polanawu xiskkidosona. SHin Yesuusi keehi daafurikkokka, beegotti uttidi

14. Yesuusi Luqaasa 21:34, 35n nuna zoridobay aybee?

15. PHeexiroosi, Yaaqoobinne Yohaannisi waanidonaa, qassi hegee nu bollikka waani gakkana danddayii?

ba Aawaa mintti woossiis. A laggetikka hegaadan oottana bessishin aggidosona.—Mar. 14:32-41.

<sup>16</sup> Lo’obaa amottiyoogaa xallay ayyaanaaban ‘mino’ gidiiyoogaa woy beegottiyoogaa bessenna. Geetesemaane ataa-kiltte sohuwan hanidabaappe amarida gallassaa kasetidi, Yesuusi he erissiyo ashkkarati Yihoowa mintti woossanaadan yootiis. (**Luqaasa 21:36 nabbaba.**) Yaatiyo gishshawu, nuunikka ayyaanaaban beegottidi de’anawu ubbatoo woossana koshshees.—1 PHe. 4:7.

#### UBBATO NAAGA UTTA

<sup>17</sup> Yesuusi wurssettay nuuni “qoppenna saatiyan” yaanaagaa yootido gishshawu, ha wodee ayyaanaaban azalliyo wode, woy qassi Seexaanaynne a alamee giigissiyoonne nu ashoy amottiyo aymo malabawu bichaariyo wode gidenna. (Maa. 24:44) Xoossaynne Kiristtoosi eti nuuyyo matan immanabaa, qassi nuuni waanidi naagi uttana danddayiiaakko Geeshsha Maxaafaa baggaara yootoosona. Yaatiyo gishshawu, Geeshsha Maxaafaa hiraagaa, qassi hegee waani polettiyaakko loytti akeekiyaageeta gidoos. Hegaa bollikka, Yihoowakko kaseegaappe aaruwan shiiqanawunne nu de’uwan a Kawotettaa kaseyanawu amottoos. Yaatikko, wurssettay yiyo wode nuuni giigetidaageeta gidana. (Ajj. 22:20) Nuuni attanay yaatiyoogaa xallaana!

16. Luqaasa 21:36n qonccidaagaadan, nuuni ‘minnanaadan’ woykko beegotti naaganaadan Yesuusi woygi zoridee?

17. Mati yaanabaa giigetidi naagiyoogaa waati erana danddayiyo?

#### WURSSEETA QOFAA

[1] (mentto 14) Xoossaa Kawotettay Haariiddi De’ees! giyo maxaafaa shemppo 21 xeella.

# “Yayyoppa, Taani Nena Maaddana”



QAMMA bilahe issisaa baydda de'yaabadan qoppa. Issi uri nena kaalliiddi de'yoogaa akeekadasa. Neeni eqqiyo wode ikka eqqees. Neeni eesuwan hemettiyo wode ikka eesotees. Yaatin, matan de'iya ne laggiiyaa soo woxxaydda baasa. Ne laggee kariyaa dooyidi nena mokki ekkiyo wode, woppu gaasa.

Geella heгаа malabay nena gakkana xayikkonne, de'uwana gakkiiya un'issiya harabay neeni hirgganaadan oottana danddayees. Leemisuwawu, neeni iita meeziiyaa agganawu keehi baaxetikkonne zaara zaarada balabaa oottay? Neeni oosuwaa demmanawu neeyyo danddayettidabaa ubbaa oot-tikkokka, oosuwaa demmenna daro wodiya takkadii? Neeni layttaa sugaydda de'iyoo gishshawu payyatettaara gayttidaagan metootana gaada hirggay? Woy nena hirggissiya harabi de'ii?

Nena metiyaabay aybanne gidin, hirggissiyaa- baa ayyo yootana danddayiyo, qassi koshshiyaa- ban nena maaddana danddayiyya uraa demmiyo wode heгаа nashshikkii? Neeyyo heгаа mala dab- boy de'ii? Ee, de'ees! Isiyaasa 41:8-13n Yihooway Abrahaamayyo dabbo gidiiyoogee odettidoogaa- dan, i neeyyookka dabbo gidana. Paydo 10ninne 13n Yihooway ba ashkkratuyyo hagaadan giis: “Taani nenaara de'iyoo gishshau yayyoppa; taani ne Xoossaa gidiiyo gishshau dagammoppa. Taani nena minttana; qassi taani nena maaddana. Taani

nena ta xooniya ushachcha kushiyan kaafada oi- qana. Aissi giikko, taani GODAI, ne Xoossai, ne ushachcha kushiya oiqqana. . . . ‘Yayyoppa, taani nena maaddana.’”

## ‘TAANI NENA KAAFADA OYQQANA’

Ha qofay nena minttetteene? Yihooway nuuy- yo gelido qaala qoppa. Ha xiqisee neeni Yihoowa kushiya oqqada a miyyiyan biyoogaa bessiyaaba gidenna. Neeni Yihoowaara miyyiyan miyyiyan bi- yaabaa gidiiyaakko, a ushachcha kushee ne haddirssa kushiya oqqana. SHin, Yihooway ba “xooniya ushachcha kushiyan” leemiso hanotan “ne ushach- cha kushiya” oqqidi, nena un'issiyaabaappe kes- sees. I hegaan ne kushiya oqqidi, “Yayyoppa, taani nena maaddana” yaagidi minttettees.

Neeni un'ettiyo wode, Yihoowa nena maaddi- yaanne siiqiya Aawadaaninne Dabbodan xeellay? I neeyyo qoppeesinne nena maaddanawu koyees. I neeyyo mata dabbo gidiiyo gishshawu, nena metoy gakkiiyo wode woppissanawu koyees. “Nuna metoi gakkiiyo wode, maaddanau i ubbaton matan de'ee- es.”—Maz. 46:1.

## KASE MOORIDOBAN ZIL'ETTIYOOGAA

Issoti issoti kase mooridoban ubbatoo zil'et- toosona; qassi Xoossay atto gaaneesha giidi qoppoosona. Neenikka hegaan qoppiyaaba gi- dikko, ‘yelagattan de'iiddi oottido mooruwaa’

hassayida, ammanettida Iyyooba hanotaa qoppa. (Iyy. 13:26) Daawitawukka hegaadan siyettido gishshawu, “Ta yelagatettaa nagaraanne mooruwaa hassayoppa” yaagidi i Yihoowa woossiis. (Maz. 25:7) Nuuni ubbay ‘nagaraa oottida; qassi ashshiya Xoossaappe haakkida.’—Roo. 3:23.

Isiyaasa shemppo 41n de’iya qofay odettidoy beni wodiyan de’ida Xoossaa asaassa. Eti wolqqaa-ma nagaraa oottido gishshawu, omoodettidi Baabiloone biitti baanaadan oottidi eta qaxxayanawu Yihooway qoppiis. (Isi. 39:6, 7) SHin, Xoossay bantta nagaraappe simmidi baakko shiiqiyaageeta ashshanawukka kasetidi qoppiis. (Isi. 41:8, 9; 49:8) Ha wodiyan, a maarotaa wozanappe koyiyaageetussi Yihooway hegaadan kehees.—Maz. 51:1.

Pokkobaa be’iyoonne mastterbeeshiniyaa giyo shori baynnabaa oottiyo iita meeziyaa agganawu baaxetida Takuyabaa\* qoppa. He meezee takki takkidikka a metiis. Awu aybi siyettidee? I, “Taani Yihoowa woossanawunne a maarotaa oychanawu bessenna asadan ta huuphiyaa xeellikkokka, i taani kunddidosappe denttees” yaagiis. Yihooway hegaadan waati oottidee? Takuya gubaa’iyaa cimati he meezee a zaarettidi metiyo wode etawu dawlanaadan minttettidosona. I, “Etawu dawaliyoogee deexxiyaaba gidikkonne, hegaadan oottiyo wode ubban minettays” yaagiis. He gubaa’iyaa cimati woradaa xomoosiya ishay Takuya xomoosanaadan oottidosona. Woradaa xomoosiya ishay awu, “Gubaa’iyaa cimati taani nena xomoosanaadan hanotaa giigissin neekko yaasippe attin, coo yabeykke. Taani nena xomoosanaadan eti koyidosona” yaagiis. Takuyi, “Nagaraa oottiday tana; shin Yihooway cimatu baggaara tana maaddana koyiis” yaagiis. Takuyi ayyaanaaban diccidi kumetta wodiya aqinye gidii; qassi ha”i macara biiruwan haggaziiddi de’ees. Xoossay ha ishaa maaddidoogaadan, kunddidosappe nenakka denttana.

## OOSO DEMMANAWU METOOTIYOOGAA


Oosoy baynnaageenne ooso demmanawu metootiyoogee daro asaa hirgissiyaaba. Issoti issoti

\* Issi issi asatu sunttay laamettiis.

oosuwaappe yedetettidi hara oosuwaa demmanawu metootoosona. Ootissiyaageeti nena oosuwaappe darotoo yedettiyaakko neeyyo aybi siyettanaakko qoppa. Issoti issoti heгаа malabay gakkiiyo wode banttana pattenna asadan xeelloosona. Hegaа mala wodiyan, Yihooway nena waati maaddanee? I neeni koyiyoogaa mala oosuwaa sohuwaara demmanaadan oottana xayikkonne, Kawuwaa Daawiti giidobaa hassayada neeni minettanaadan maaddana danddayees. Daawiti, “Taani kase yelaga; ha77i simmi cimaas; shin xillo asi coo attin, woikko a naati miyoobaa woossin, taani mullekka be7a erikke” yaagiis. (Maz. 37:25) Ee, Yihooway nena xoqqu oottidi xeellees; qassi neeni awu haggazanaadan neessi koshshiyaabaa immiyoogan ba “xooniya ushachcha kushiyan” maaddes.

Kolombbiyaa biittan de’iya Saara Yihooway bana waati maaddidaakko akeekaasu. A issi gita dirijjitiyan qaxarettada daro saatiyaa oottiyoogan daro damoozaa mawusu. SHin a Yihoowawu loytta haggazanawu koyido gishshawu, he oosuwaa aggada aqinye gidada haggaziyoogaa doommaasu. Gi-doppe attin, a amarida saate xallaa oottanawu

Oosuwaappe yedetettikko Yihooway nena waati maaddana danddayii?



koyaasu; shin sohuwaara demmabeykku. A ay-skreemiyaa bayzziyo guutta suuqiyaa dooyikkokka, guyyeppe iyyo de'iya miishshay wurido gishshawu suuqiyaa gordda aggaasu. Saara, “Heezzu layttay aadhikkokka, taani gencanaan Yihoo-way maaddido gishshawu a galatays” yaagaasu. A baassi koshshiyaabaanne a koyiyoobaa gid-don de'iya dummatettaa eraasu; qassi wonttobawu hirggana bessennaagaakka akeekaasu. (Maa. 6: 33, 34) Guyyeppe, kase halaqay o xeesidi, a kase oottiyo oosuwaa oottanaadan oychiis. A amarida saate xallaa oottanawu, qassi ayyaanaabaa oottanawu wodiya demmanaadan maaddiyaaba gidiko oottanaagaa yootaasu. Saara kaseegaa keena miishshaa demmana xayikkokka, aqinye gidada haggaa ziyoogaa aggabeykku. Saara he meto wode ubban Yihooway o keehi maaddidoogaa akeeki-doogaa yootaasu.

### LAYTTAA SUGIYOOGAARA GAYTTIDAAGAN HIRGGIYOOGAA

Layttaa sugiyoogeekka hirggissiya haraba. Daro asay xurataa kiyidi de'uuwaassi koshshiya miishshaa waati demmanaakko hirgges. Qassi cimi cimi biyo wode payyatettaara gayttidaagan gakkana metu-waabaykka eta hirggissees. Geeshsha Maxaafan,

Hoseenne Roza Tonna Wendiira



“Taani cimido wodiyan tana oloppa; ta wolqqai ix-xido wodiyan tana aggoppa” giidi Yihoowa woosiday Daawita gidennan aggenaa.—Maz. 71:9, 18.

Yaatin, Yihoowa ashkkaarati cimiyo wodiyan waanidi hirggennan de'ana danddayiyoona? Xoossay etawu koshshiyaabaa kuttanaagaa eti ubbato ammanana bessees. Eti kase ishala de'uwaa de'ikko, hegaadan de'iyoo-gaa aggidi guuttabay gidana giidi de'ana koshshiyoogaa akeekana danddayoosona. Eti “modhdho ashuwaa” miyoogaappe ‘santtaa miyoogee’ lo'o gidiyoogaa, ubba qassi hegee eta payyatettawukka maaddiyoogaa akeekana danddayoosona. (Lee. 15:17) Neeni Yihoowa ufaayssanawu baaxetikko, cimiyo wodekka i neeyyo koshshiyaabaa *kunttana*.

Kumetta wodiyan Yihoowawu 65ppe dariya layttawu haggaa zida Hosanne Rozi hanotaa qoppa. Eti gallassinne qammi maaddana koshshiyo Rozi aawaa daro layttawu maaddidosona. Qassi Hosee kansseriyaa harggidi shuhettiisinne *kemoterapi* giyo wolqqaama akkamuwaa akkamettiis. He ammanettida azinaanne machiyo Yihooway ba ushacha kushiyan kaafidee? Ee, shin waatidi? Eta gubaa'iyan de'iya Toninne a machiyaa Wenda etawu keettaa immanaadan oottiyoogaana. Toninne Wenda kumetta wodiya aqinyetussi giidi keettaa keraa qanxxissennan immanawu koyidosona. Daro layttappe kase, Toni naa'antto xekka timirtte keettan tamaariyo wode Hoseenne Roza darotoo haggaa zishin maskkootiyaara eta be'ees. Eti mishettidi haggaa ziyo gishshawu, eta keehi dosees; qassi eta leemisoy a lo'obawu denttettiis. He cima azinaynne machiyaa bantta de'o laytta ubban Yihoowawu haggaa zidoogaa Toninne Wenda akeekidoogee eti bantta keettaa etawu immanaadan denttettiis. Ha'i etawu layttay 85 heera gidido Hosanne Roza eti aadhida 15 layttawu maaddidosona. He yelagaa azinaanne machee maaduwa eto Yihoowa imotadan xeelloosona.

Xoossay ba “xooniya ushachcha kushiyan” ne-nakka maaddes. “Yayyoppa, taani nena maaddana” yaagida Yihooway ne kushiya oqqanaadan eno guutee?



# Xoossaa Aaro Kehatettaa Nashshidi Ekkiyaageeta

*“Nuuni ubbai a . . . aaro kehatettaappe anjuwaa ekkida.”*

—YOH. 1:16.

WOYNIYAA turaa goday ba gaden keraa oottiya asaa qaxaranawu issi gallassi maallado ogiyaa kiyiis. He asati i immana giido miishshan giigidi oosuwwu biidosona. SHin bitanee harakakka gujjidi qaxaranawu koyido gishshawu, gallassa ubban zaaretti zaarettidi he sohuwaa biis; ubba i tammanne isiini saatiyan qaxaridoogeetussikka eta waagaa qanxxanawu qoppiis. Sa'ay omariyo wode, i eta damoozaa qanxxanawu oosanchata ubbaa shiishshii; yaatidi, daro saatiyaa oottidaageetuyyookka qassi issi saate xallaa oottidaageetuyyookka issi lagge miishshaa immiis. Koyro qaxarettida asati heгаа eridi zuuzummidosona. Woyniyaa turaa goday hagaadan giis: ‘Taani qanxxana giido miishshan tanaara giigabeykkii? Ta oosanchatuyyo taani koyidoogaa keena miishshaa immana danddayikinaa? Taani keha gidido gishshawu, neeni qanaatay?’—Maa. 20:1-15.

<sup>2</sup> Yesuusi yootido ha leemisoy Geeshsha Maxaafan odetida Yihoowa eeshshatuppe issuwaa, a “aaro kehatettaa”

1, 2. (a) Woyniyaa turaa godaabaa Yesuusi yootido leemisuwaa qonccissa. (b) Ha taarikee kehatettaanne aaro kehatettaa waati qonccissii?

MAZAMURE: 1, 13

## WOYGADA ZAARUUTEE?

Yihooway asawu ba aaro kehatettaa bessido oge ubbaappe aadhiyaagee awugee?

Nuuni nagarawu haarettiyoogaa aggidi aaro kehatettawu haarettana koyiyoogaa waati bessana danddayiyo?

Yihoowa aaro kehatettaa nuuyyo ayba anjuwaa demissii?

hassayanaadan oottees. **(2 Qorontoosa 6:1 nabbaba.)** Issi saate xallawu oottidaa-geeti kumetta gallassaa oottidi demmiyo miishshaa ekkiiyoogaa bessiyaabadan qoppibookkona; shin woyniyaa turaa goday etawu darin kehiis. “Aaro kehatettaa” geettida qaala xelliyaagan issi eranchay, “He qalay qonccissiyo waannabay issi urawu i baassi bessees giidi qoppennan is-sibaa coo kehatettan immiiyoogaa” gidiiyoogaa yootiis.

### YIHOOWAY KEHATETTAN IMMIDO IMOTAA

<sup>3</sup> Geeshsha Maxaafay Xoossay ‘immido aaro kehatettaabaa’ yootees. (Efi. 3:7) Yihooway he imotaa waati immidee, qassi i hegaa immidoy aybissee? Nuuni Yihoo-wa maaraa bali baynnan poliyaaba gidiiyaakko, a kehatettay nuussi bessees. SHin nuuni a maaraa suure kaallokko. Erancha Kawuwaa Solomoni, “Xillobaa xalaa-laa oottiiddi, nagara oottennan de7iya asi ha sa7aa bolla baawa” yaagiis. (Era. 7:20) Kiitettida PHawuloosikka, “Asai ubbai nagaraa oottiis; ashshiya Xoossaappe haakkidosona” yaagiis; qassi gujjidikka, “Nagarai qanxxiyo miishshai haiquwaa” yaagiis. (Roo. 3:23; 6:23a) Ee, nuuyyo bessiyay hayquwaa.

<sup>4</sup> SHin Yihooway ba aaro kehatettan nagaranча gidida asa siiqiiyoogaa bessiya gitabaa oottiis. I “ba mexi issi Na7aa” ha sa’aa kiittidi i nu gishshawu hayqqanaadan oottidoogee aybippenne aadhiya imota. (Yoh. 3:16) PHawuloosi Kiristtoosa xelliyaagan ‘Yesuusi Xoossaa aaro kehatettaa baggaara asa ubbawu hayqqana mala hayqo waayiyaa i waayettido gishshawu, poo’-

3, 4. Yihooway asa ubbawu aaro kehatettaa waati bessidee, qassi aybissi?

iya bonchonne saba akiliiliyaa wottidoo-gaa’ yootiis. (Ibr. 2:9) Ee, “Xoossai nu Godaa Kiristtoos Yesuusa baggaara immiyo imoi merinaa de7uwaa.”—Roo. 6:23b.

<sup>5</sup> Nuuni nagaraa oottiiyonne hayqqiiyoy aybissee? Geeshsha Maxaafay, “Issi bitaniyaa [Addaame] nagaraa gaasuwan, a nagaraa baggaara, haiqoi kawotidoogee tuma” yaagees. (Roo. 5:12, 14, 17) Gidikkokka, nuuni nagaray nuna haarenaadan doorana danddayoos. Kiristtoosa wozuwaa yarshshuwan ammaniyoogan Yihoowa aaro kehatettay nuna haaranaadan koyiiyoogaa bessoos. Waatidi? “Nagarai darido wode Xoossaa aaro kehatettai keehi dariis; nagari haiquwaa wolqqan kawotidoogaadan, hegaadankka qassi Xoossaa aaro kehatettai xillotettaa wolqqan kawotidi, nu Godaa Yesuus Kiristtoosa baggaara, nuna merinaa de7uwau kaalettees.”—Roo. 5:20, 21.

<sup>6</sup> Nuuni nagaranча gidikkokka, nagaray nuna haaranaadan eeno gaana bes-senna. Nuuni nagaraa oottiiyo wode, Yihooway atto gaanaadan woossana danddayoos. PHawuloosi Kiristtaanetuuyo, “Nagarai inttena haaranau bessenna; intte Xoossaa aaro kehatettaappe garssaa-ra de7eetappe attin, higgiiyaappe garssan de7ekketa” yaagiis. (Roo. 6:14) Yaatiyo gishshawu, nuuni aaro kehatettawu haarettoos. Hegee ay demissii? PHawuloosi hagaadan giis: “[Xoossaa] aaro kehatettai nagara oosuwaanne ha sa7aa amuwaa nuuni agganaadaaninne nu huuphiyaa naagidi, ha sa7an Xoossaa milatidi, xillottettan de7anaadan, nuna tamarissee.”—Tii. 2:11, 12.

5, 6. (a) Nuuni nagarawu haarettiyoogee ay kaalettii? (b) Aaro kehatettawu haarettiyoogee ay demissii?

## “DUMMA DUMMA” OGIYAN QONCCIDA AARO KEHATETTA

<sup>7</sup> Kiitettida PHeexiroosi, “Intte huuphiyan huuphiyan Xoossaappe dumma dumma aaro kehatetta ekkidoogaadankka, Xoossaa dumma imuwaa loitti gishiyaa-geetudan, issoi issuwau oottite” yaagiis. (1 PHe. 4:10) Hegee woygiyoogee? Nuna ayba paacee gakkikkokka, nuuni hegaa xoonanaadan Yihooway danddayissana. (1 PHe. 1:6) Nuna gakkiiya ay metuwaakka genccanaadan Xoossaa kehatettay ubbatoo maaddana.

<sup>8</sup> Tumakka, Yihoowa aaro kehatettay dumma dumma ogiyan qoncces. Kiitettida Yohaannisi, “Nuuni ubbai a kumetta aaro kehatettaappe anjuwaa ekkida” yaagiis. (Yoh. 1:16) Yihoowa kehatettay dumma dumma ogiyan qoncciyoogee nuuni daro anjuwaa demmanaadan oottees. Hegeetuppe amaridaageeti awugeetee?

<sup>9</sup> Nu nagaraappe maarotaa demmiyoogaa. Nuuni nagaraappe simmiyaabanne haroodde nagaraa oottennan agganawu baaxetiyaaba gidikko, Yihoowa aaro kehatettaappe denddidaagan maarotaa demmoos. **(1 Yohaannisa 1:8, 9 nabbaba.)** Xoossaa maarotay nuuni a galatanaadaaninne bonchanaadan denttettana bessees. PHawuloosi ba mala tiyettidaageetuyyo hagaadan giis: “I nuna xumaa wolqqaappe ashshidi, ba siiqiyo Na7aa kawotettaakko pinttiis. Qassi i ba Na7an nuna wozidi, nu nagaraa atto giis.” (Qol. 1:13, 14) Nu nagaraappe maarotaa demmiyoogee maalalissiya hara daro anjuwaa demissees.

7, 8. Yihoowa aaro kehatettay “dumma dumma” ogiyan qoncces giyoogee woygiyoogee? (Doo-mettan de’iya misiliyaa xeella.)

9. Yihoowa aaro kehatettay nuna waati go’ii, qassi nuuni hegaa nashshiyooгаа waati bessana danddayiyo?

<sup>10</sup> Xoossaara sigan de’iyoogaa. Nuuni nagaranча gidiyo gishshawu, yelettiyo wodeppekka doommidi Xoossaa morkke. PHawuloosi, “Nuuni Xoossaara kase morkke; shin a Na7aa haiquwan aara sigettida” yaagiis. (Roo. 5:10) Hegaadan sigettiyoogee Xoossaara saruwan de’anaadan oottees. PHawuloosi he gita maatay Yihoowa aaro kehatettaara gayttidaba gidiyooгаа hagaadan giidi qonccissiis: “Nuuni [ayyaanan tiyettida Kiristtoosa ishannti] ammanuwan xillidoogan, nu Godaa Yesuus Kiristtoosa baggaara nuuyyo Xoossaara sarotettai de7ees; qassi i nuna ha77i nuuni de7iyo Xoossaa aaro kehatettaa giddo ammanuwan ehiis.” (Roo. 5:1, 2) Hegee tumakka gita anjjo!

<sup>11</sup> Xoossaa sinttan xillo gidiyooгаа. Nuuni ubbay nagaranча. SHin “eranchchati,” woy tiyettidaageetuppe attidaageeti ‘darta xillotettaa ogiyaa kaalettanaagaa’ hananabaa yootiya Daaneeli kasetidi yootiis. **(Daaneela 12:3 nabbaba.)** Eti sabbakiyoonne tamarissiyo oosuwan miilooniyan qoodettiya ‘hara dorssati’ Yihoowa sinttan xillo gididi qoodettanaadan oottidosona. (Yoh. 10:16) Gidikkokka, hagee ubbay hanana danddayidoy Yihoowa aaro kehatettaana. PHawuloosi, “Eti Xoossai immiyo aaro kehatettan, banttana woziya Kiristtoos Yesuusa baggaara coo xillidosona” yaagiis.—Roo. 3:23, 24.

<sup>12</sup> Woosan Xoossaa araataakko shiiqiyoogaa. Yihooway ba aaro kehatettan nuuni a araataakko woosan shiiqanaadan oottidi anjjiis. PHawuloosi Yihoowa araatay

10. Xoossaa aaro kehatettaappe denddidaagan nuuni ay demmiyo?

11. Tiyettidaageeti ‘hara dorssati’ xillo gidanaadan waati maaddiyoona?

12. Woosay Xoossaa aaro kehatettaara waani gayttii?

“aaro kehatettai de7iyooosaa” gidiiyoogaa yootiis; qassi nuuni “yayyennan” yaa shiiqanaadan minttettiis. (Ibr. 4:16b) Yihoo-way he maataa nuuyyo ba Na’aa baggaara immiis; qassi “a ammaniyo ammanuwan ammanettidi, ainne yayyennan Xoos-saa sintti aadhghanau danddayoos.” (Efi. 3:12) Ay wodenne Yihoowakko woosan shiiqiyoogee a aaro kehatettaa loytti bes-siyaaba.

<sup>13</sup> *Koshshiyo wodiyān maaduwaā demmiyoogaa.* PHawuloosi nuussi “koshshiyo wode maaddiya maarotettaa ekkanaunne aaro kehatettaa demmanau” nuuni Yihoo-wakko woosan shiiqanaadan minttettiis. (Ibr. 4:16a) Nu de’uwan keehi metiyaabay gakkiiyo wode, ba kehatettan nuna maad-dana mala Yihoowa woosan oychana dan-ddayoos. Hegee nuuyyo bessenna maata gidikkonne, Yihooway nu woosaa daro-

13. Xoosaa aaro kehatettay ‘koshshiyo wodiyān’ nuna waati maaddii?

too nu mala Kiristtaanetu baggaara zaa-rees. “Hegaa gishshau, nuuni xalidi, ‘Godai tana maaddiyaagaa; taani yayyikke. Asi tana ai oottii?’ yaagoos.”—Ibr. 13:6.

<sup>14</sup> *Minttettuwaā demmiyoogaa.* Yihoowa aaro kehatettaappe denddaagan nuuni demmiyo gita anjjoy un’ettida wozanaa minttettiyoogaa. (Maz. 51:17) Yedetay gakkiiiddi de’iyo Tasalonqqe Kiristtaane-tuyyo PHawuloosi hagaadan giis: “Nu Godai Yesuus Kiristtoosi ba huuphen qassi Xoossai, nu Aawai nuna siiqidi, ba aaro kehatettan nuuyyo merinaa danddayaan-ne sinttappe ekkana giyo lo77o ufaissaa immidaagee, inttena minttetto.” (2 Tas. 2: 16, 17) Yihooway nuna siiqiyooaanne nuuyyo qoppiyoogaa eriyoogee ay keena minttettiyaabee!

<sup>15</sup> *Merinaa de’uwaā hidootaa.* Nuuni na-

14. Yihoowa aaro kehatettay nuna waati maaddii?

15. Xoosaa aaro kehatettay nuuyyo ayba hidootay de’anaadan oottidee?

### Xoosaa aaro kehatettay qonccido ogiyaa:

Mishiraachuwaā siiyiyo  
maataa  
(Mentto 11 xeella)

Woosaa maataa  
(Mentto 12 xeella)

Koshshiyo wodiyān  
demmiyo maaduwaā  
(Mentto 13 xeella)





garancha gidiyo gishshawu, Yihooway maaddennaakko nuuyyo hidooti de'enna. **(Mazamure 49:7, 8 nabbaba.)** SHin Yihooway nuuyyo keehi ufayssiya hidootaa immiis. Yesuusi bana kaalliyageeta, “Ta Aawai koyiyoogee haggaa; tana Na7aa be7idi, ammaniya ubbati merinaa de7uwaa ekkana” yaagiis. (Yoh. 6:40) Ee, merinaa de'uwaa hidootay Xoossay ba aaro kehatettan immido gita imota. PHawuloosi heggaa loyyti akeekido gishshawu, “Xoossai asa ubbaa ashshiya ba aaro kehatettaa qonccissiis” yaagiis.—Tii. 2:11.

### XOOSAA AARO KEHATETTA TOOCHOPPA

<sup>16</sup> Yihoowa aaro kehatettay nuuyyo daro anjuwaa demissiyaaba gidikkokka, nuuni a aaro kehatettaa toochidi nagaraa oottanawu qoppaana bessenna. Koyro xeetu layttan de'ida issi issi Kiristtaaneti 'Xoossaa aaro kehatettaa shaaramuxattawu' gaaso ootidosona. (Yih. 4) He ammanettibeenna Kiristtaaneti nagaraa oottana danddayiyaa-badaaninne Xoossay etawu atto gaanaadan oychana danddayiyaabadan qoppennan aggokkona. Ubba eti gubaa'ayan de'iya haratikka etaagaadan nagaraa oottanaadan denttettanawu malidosona. Ha wodiyan-kka, hegaadan oottiya asi 'Xoossaa aaro kehatettaa cayeess.'—Ibr. 10:29.

<sup>17</sup> Ha wodiyan, Seexaanay issi issi Kiristtaaneti nagaraa oottikko Yihooway bantta nagaraa sohuwaara atto gees giidi qoppaanaadan oottiyoogan cimmees. Yihooway bantta nagaraappe simmiyaageetuyyo atto gaanawu koyiyoogee tuma; shin i nuuni nagaraa oottanaadan denttet-

tiyaabaa minnidi eqettanaadan koyees. PHeexiroosi hagaadan giidi xaafanaadan i denttettiis: “Ta siiqotoo, intte heggaa eriyo gishshau, makkalanchchatu balan cimettidi, wora beenna malanne, qassi minnidi de7iyi sohuwaappe kunddenna mala naagettite. SHin intte nu Godaa, nuna ashshiya Yesuus Kiristtoosa aaro kehatettaaninne erattetan diccite.”—2 PHe. 3:17, 18.

### AARO KEHATETTAY OOTTIYO MAATAA DEMISSEES

<sup>18</sup> Nuuni Xoossaa aaro kehatettaa nashshidi ekkidoogan keehi ufayttoos. He imotaa Xoossaa bonchanawunne harata maaddanawu goettana bessees. Waatidi? PHawuloosi hagaadan giis: “Xoossai nuuyyo immido aaro kehatettan dumma dumma imoi de7ees; nu imoi . . . oottiyoobaa gidikko, he oosuwan minnanau bessees; tamarissiyooobaa gidikko, he tamarissuwan minnanau bessees. Harata minttettiyoobaa gidikko, he aani minnanau bessees; . . . haratuyyo kehiya urai ufaissan kehanau bessees.” (Roo. 12:6-8) Yihooway ba aaro kehatettaa nuussi bessidoogee nuuni minnidi haggazanaadan, harata Geeshsha Maxaafaa tamarissanaadan, nu mala Kiristtaaneta minttettanaadaaninne asi nuna naaqqiyo wode atto gaanaadan denttettana bessees.

<sup>19</sup> Xoossaa gita siiquwaa nashshidi ekkiiyaageeta gidiyoogee, “Xoossaa aaro kehatettaa wonggeliyaa mishiraachchuwaa markkattiyoogaa polanau” nuna denttettana koshshees. (Oos. 20:24) Ha gita maataabaa kaalliya huuphe yohuwan aahuwan be'ana.

16. Koyro xeetu layttan issi issi Kiristtaaneti Xoossaa aaro kehatettaa toochiyoogaa waati bessidona?

17. PHeexiroosi yootido wolqqaama zoree aybee?

18. Yihoowa aaro kehatettay nuuyyo demissiyoo maatay aybee?

19. Nuuyyo imettida ay maataabaa kaalliya huuphe yohuwan be'anee?



## Xoossaa Aaro Kehatettaa Mishiraachuwaa Yootite

*“Xoossaa aaro kehatettaa wonggeliyaa mishiraachchuwaa markkattiyoogaa [polite].”—Oos. 20:24.*

**MAZAMURE: 10, 25**

### WOYGADA ZAARUUTEE?

Yihoowa aaro kehatettay nuuni ay oottanaadan denttettana bessii?

‘Kawotettaa wonggeliyaa mishiraachoy’ Xoossaa aaro kehatettaa waati qonccissii?

Yihooway oorattaa alamiyan ba aaro kehatettaa waati bessanee?

PHAWULOOSI, “Taassi [Xoossay] immido aaro kehatettaa hada gidibeenna” yaagiis. **(1 Qoronttoosa 15:9, 10 nab-baba.)** PHawuloosi kase Kiristaaneta yedettiyaagaa gidiyo gishshawu, Xoossaa gita maarotettay awu bessennaagaa akeekiis.

<sup>2</sup> PHawuloosi hayqqanaappe amarida wodiya kasetidi ba-naara oottiya Ximootiyoosayyo, “Taani oottiyo oosuwan taayyo wolqqaa immida nu Godaa Kiristtoos Yesuusa galatais. Tana ba oosuwau sunttidi, tana he oosuwau bessiyaagaa giidi qoodiyo gishshaukka a galatais” yaagidi xaafiis. (1 Xim. 1: 12-14) He oosoy aybee? PHawuloosi Efiisoonaa gubaa’iyaa cimatuuyyo, “Ta wottaa polanaunne Godaa Yesuus Kiristtoosappe taani ekkido oosuwaa *Xoossaa aaro kehatettaa wonggeliyaa mishiraachchuwaa markkattiyoogaa polanau*, ta shemppuwaa pattennabaadan qoodais” yaagiis.—Oos. 20:24.

1, 2. PHawuloosi Xoossaa aaro kehatettawu galatiyoogaa waati bessidee?

<sup>3</sup> Yihoowa aaro kehatettaa qonccissiya, PHawuloosi sabbakido ‘mishiraachoy’ ay-bee? I Efisoona Kiristtaanetuyyo, “Xoossai ba aaro kehatettan, taani inttena maaddanaadan, ha oosuwa taayyo immidoogaa intte loitti siyideta” yaagiis. (Efi. 3:1, 2) PHawuloosi Ayhuda gidenna asawu mishiraachuwa yootanaadan kiitetiis; hegaappe dendidagaan, etikka Masiyaa Kawotettaa haaruwan Kiristtoosaara issippe haarana danddayoosona. **(Efisoona 3:5-8 nabbaba.)** PHawuloosi mishettidi oottiyoogan ha wodiyan de’iya Kiristtaanetuyyo leemiso gidiis; qassi Xoossay ayyo bessido aaro kehatettay “hada” atti-beennaagaa bessiiis.

#### XOOSSAA AARO KEHATETTAY INTTENA DENTTETII?

<sup>4</sup> Ha wurssetta wodiyan Yihoowa de-ree, ‘asa ubbawu markka gidana mala, kawotettaa wonggeliyaa mishiraachuwa sa’a ubban yootanaadan’ azazettiis. (Maa. 24:14) Nuuni ‘Xoossaa aaro kehatettaa wonggeliyaa mishiraachuwaakka’ asawu yootoos; aybissi giikko, nuuni Kawotettaa haaruwan demmanawu hidoottiyo anjjo ubbay Kiristtoosa baggara qonccida Yihoowa kehatettan demmanaba. (Efi. 1:3) Nuuni mishettidi haggaaaziiddi Yihoowa aaro kehatettaa nashshiyooogan PHawuloosa leemisuwa kaalliyo?—**Roome 1:14-16 nabbaba.**

<sup>5</sup> Hagaappe kasetiya huuphe yohuwan, nuuni nagarancha gidikkokka, Yihoowa aaro kehatettaappe daroban go’ettiyoogaa tamarida. Hegaa gishshawu, Yihooway ba siiquwaa waati bessidaakko,

3. PHawuloosayyo imetida dumma oosoy aybee? (Doomettan de’iya misiliyaa xeella.)

4, 5. ‘Kawotettaa wonggeliyaa mishiraachoyne’ ‘Xoossaa aaro kehatettaa wonggeliyaa mishiraachoy’ issi mala gaana danddayiyo aybisse?

qassi eti hegaappe waani go’ettana danddayiyaakko ubba asawu yootanawu nuuni baaxetana koshshees. Harati Xoossaa aaro kehatettaa nashshanaadan maaddana danddayiyo ogeti awugetee?

#### WOZUWAA YARSHSHUWAA MISHIRAACHUWAA YOOTITE

<sup>6</sup> Ha wodiyan de’iya daro asay nagaraa oottiyo wode zil’ettenna gishshawu, asawu wozoy koshshiyooogaa akekenna. Qassi daroti hegaadan de’iyoogee ufayssennaagaa akeekidosona. Daro asati Yihoowa Markkatuura gayttana gakkanaassi nagari aybakko, hegee nuna waati qohiyaakko, qassi nagaraa ayillettaappe kiyawu ay oottana koshshiyaakko erokkona. Ashkke asati Yihooway ba gita siiquwaaninne ba aaro kehatettan ba Na’ay nuna nagaraappenne hayquwaappe wozanaadan a sa’aa kiittidoogaa eriyo wode keehi ufayttoosona.—1 Yoh. 4:9, 10.

<sup>7</sup> Yihooway siiqiyo Na’abaa PHawuloosi, “Nuuni Xoossaa aaro kehatettaa daruwaadan, Kiristtoosa su[u]ttan wozettida; hegan Xoossai nu nagaraa atto giis” yaagiis. (Efi. 1:7) Kiristtoosa wozuwa yarshshoy Xoossaa siiqoy qonccido oge ubbaappe aadhiyaabanne a aaro kehatettay daro gidiyooogaa bessiyaaba. Yesuusa suuttan ammanikko, nu nagaray atto geettanaagaanne nu zoriya wozanay geessha gidanaagaa eriyoogee ay keena woppissiyaabee! (Ibr. 9:14) Hagee tumukka yootana bessiya mishiraacho!

#### ASAY XOOSSAARA DABBOTAA MEDHANAADAN MAADDITE

<sup>8</sup> Nuuni asay banttana Medhidaagaara

6, 7. Nuuni wozuwaabaa asawu markkattiyo wode, Xoossaa aaro kehatettaa mishiraachuwa yootiyoy ayba ogiyaanee?

8. Nagarancha asay Xoossaara sigettana koshshiyoy aybisee?

dabbotaa medhana danddayiyoogaa erisana koshshees. Asay Yesuusa wozuwaa yarshuwaa ammananaappe kase, Xoossay eta morkkedan xeellees. Kiitettida Yohaannisi, “Na7aa ammaniya urau merinaa de7oi de7ees; shin Na7aa ammanennaagaa bolli Xoossaa hanqqoi de7anaagaappe attin, i de7o be7enna” yaagiis. (Yoh. 3:36) Kiristtoosa yarshshoy Xoossaara sigettanaadan oottiyoogee ufayssiyaaba. PHawuloosi hagaadan giis: “Intte iitabaa oottido gishshaanne qoppido gishshau, Xoossaappe shaahettidi, aara morkkettideta. SHin Xoossai . . . ba Na7aa haiqqidaagaa asatettan banaara inttena sigettiis.”—Qol. 1:21, 22.

<sup>9</sup> Kiristtoosi tiyettida ba ishanntuuyo “sigettiyo oosuwaa” immidoogaa PHawuloosi yootiis. PHawuloosi hegaa koyro xeetu layttan de’ida, tiyettida Kiristtaanetuuyo qonccissiiddi hagaadan giis: “Kiristtoosa baggaara nuna banaara sigettida Xoossai ubbabaakka oottiis; qassi i nuuyo harata banaara sigettiyo oosuwaa immiis. Xoossai Kiristtoosa baggaara asa ubbaa banaara sigettees; asa nagaraakka asa bolli qoodenna; qassi asa banaara sigettiyo kiitaakka nuuyo immiis. Simmi Xoossai nu baggaara intteyyo haasayiyoogaadan, nuunikka Kiristtoosa gishshaa haasayiya i kiittidoogeeta; qassi nuuni inttena, ‘Xoossaara sigettite’ giidi, Kiristtoosa gishshaa woossoos.”—2 Qor. 5:18-20.

<sup>10</sup> ‘Hara dorssati’ ha oosuwan ayyaanan tiyettida bantta ishannta maaddiyoo-gaa gita maatadan xeelloosona. (Yoh. 10:16) Eti ayyaanan tiyettidaageeta maaddiyaa-

9, 10. (a) Kiristtoosi ayyaanan tiyettida ba ishanntuuyo immido aawatettay aybee? (b) ‘Hara dorssati’ tiyettida bantta ishannta waati maaddiyoo-naa?

geeta gididi, asaa ayyaanaaban tamaris-siyoogan darobaa oottoosonanne asay Yihoowaara dabbotanaadan maaddoosona. Hegee Xoossaa aaro kehatettaa mishiraachuwa markkattiyoo-gaa polanawu keehi koshshiyaabaappe issuwaa.

### XOOSSAY WOOSAA SIYIYOOGAA MISHIRAACHUWAA YOOTITE

<sup>11</sup> Daro asay Xoossay woosaa siyiyoo-gaa ammanana xayikkokka, etayyo lo’obay siyettanaadan oottiyo gishshawu woossoosona. Eti Yihooway ‘woosaa siyiyaagaa’ gidiyoo-gaa erana koshshees. Mazamuraawe Daawiti, “Abeet woosaa siyiyaagoo, asai ubbai neekko yaana. Nu nagarai nuna muukkido wode, neeni nu mooruwaa atto gaadasa” yaagiis.—Maz. 65:2, 3.

<sup>12</sup> Yesuusi ba erissiyoo ashkkarata, “Intte ta sunttan tana ai oichchikkokka, taani polana” yaagiis. (Yoh. 14:14) Hegee Yihoowa sheniyaara maayiyaabaa “ai” gidikkokka, nuuni woossana danddayoos giyoogaa. Yohaannisi, “Xoossai koyiyoogaadan, ainne nuuni a woossikko, i siyiyoo-gaa nuuni eriyo gishshau, a sinttan yayyokko” yaagiis. (1 Yoh. 5:14) Woossay lo’obay siyettanaadan oottiyaaba xalla gidennan, “aaro kehatetta de7iyoo-saa Xoossaa araataakko” shiiqanaadan oottiya keehi gita imota gidiyoo-gaa harata tamaris-siyoogee keehi ufayssiyaaba! (Ibr. 4:16) Asay bessiya ogiyan woossanaadan, woossana bessiya uraakko woossanaadaaninne woossana bessiyaabawu woossanaadan tamaris-siyoogan, eti Yihoowakko shiiqanaadaaninne meto wodiyan minettanaadan maaddana danddayoos.—Maz. 4:1; 145:18.

11, 12. Asay Yihoowakko woossana danddayiyoogaa tamaris-siyoogee mishiraacho gidiyoy aybissee?

## SINTTAPPE YAANA WODIYAN QONCCANA AARO KEHATETTA

<sup>13</sup> Yihoowa aaro kehatettay ha iita alamee xayı simminka qonccana. Saluwaa Kawotettan Kiristtoosaara haarana, 144,-000 asawu Xoossay immiyo maalaalissiya woytuwaa xeelliaagan PHawuloosi hagaadan giis: “Xoossaa maarotettai daro gidiyo gishshau, ba siiquwaa daruwaadan, nuuni ayyo azazettennan ixixidi, harai atto ayyaanan haiqqidaageeta gidinkka, i Kiristtoosaara nuuyyo de7uwaa immiis. Xoossaa aaro kehatettan intte attideta. Nuuni Kiristtoos Yesuusaara saluwaa sohuwan haaranaadan, Xoossai nuna aara issippe haiquwaappe denttiis. I sinttappe yaana wodiyan, nuuyyo Kiristtoos Yesuusan de7iya kehatettan, ubbaappe aadhdhiya ba aaro kehatettaa gitatettaa bessanaa hegaa oottiis.”—Efi. 2:4-7.

<sup>14</sup> Yihooway ayyaanan tiyettida Kiristtaaneti Kiristtoosaara haariyo wode etawu immanawu giigissido gita woytoy aybakko qoppanawukka metiyaaba. (Luq. 22:28-30; Pili. 3:20, 21; 1 Yoh. 3:2) Yihooway haratuppe dummayidi etayyo “ubbaappe aadhdhiya ba aaro kehatettaa gitatettaa” bessana. Eti “ooratta Yerusa laame” woykko Kiristtoosawu bullashettiyaaro gidana. (Ajj. 3:12; 17:14; 21:2, 9, 10) Eti Yesuusaara ‘zare ubbaa harggiyaappe pattana,’ hegeekka, azazettiya asaa naga raanne hayquwaa ayillettaappe kessidi wottiyoobi baynna asa oottana.—**Ajjuutaa 22:1, 2, 17 nabbaba.**

<sup>15</sup> Efiisoon 2:7y Xoossay “sinttappe yaa-

13, 14. (a) Ayyaanan tiyettidaageeti sinttappe demmana maalaalissiya woytoy aybee? (b) Tiyettidaageeti asawu oottana maalaalissiya oosoy aybee?

15, 16. Yihooway ‘hara dorssatuyyo’ ba aaro kehatettaa sinttappe waati bessanee?

na wodiyan” ubbaappe aadhiya ba aaro kehatettaa gitatettaa bessanaagaa yoo tees. Yihooway sinttappe yaana wodiyan “ubbaappe aadhdhiya ba aaro kehatettaa gitatettaa” ha sa’anikka bessanaagee erettidaagaa. (Luq. 18:29, 30) Yihooway ba aaro kehatettan ha sa’an oottana maalaalissiyaabatuppe issoy “duufo giddon” de’iyaageeta denttiyoogaa. (Iyy. 14:13-15; Yoh. 5:28, 29) Kiristtoosi yarshsho gididi hayqqanaappe kase hayqqida ammanettida asatinne ha wurssetta gallassatun ammanettidi hayqqiya ‘hara dorssati’ ubbay Yihoowayyo haggaaazanawu hayquwaappe denddana.

<sup>16</sup> Xoossaa erennan hayqqida miilooniyan qoodettiya asaykka hayquwaappe denddana. Eti Yihoowayyo haaretta na koshshiyooogaa tamarana. Yohaannisi hagaadan giis: “Haiqqidaageeti, gitatinne guuttati araataa sinttan eqqidaageeta taani be7aas. Maxaafati dooyettidosona; hara maxaafai, de7o maxaafaikka dooyettiis. Haiqqidaageeti bantta oosuwaadan, maxaafatun xaafetti uttidaagaa dankka pirddettidosona. Abbai ba giddon de7iya haiqqidaageeta immiis; haiqoinne Si7oolee bantta giddon de7iya haiqqidaageeta immidosona. Ubbatika bantta oosuwaadan pirddettidosona.” (Ajj. 20:12, 13) Hayquwaappe denddiyaageeti Geeshsha Maxaafan de’iya maaraa waati kaallana bessiyaakko tamarana. Hegaa bollikka, ooratta alamiyan de’anaageetuppe koyettiya, Yihooway kessido maaraa qonccissiya, “maxaafatun” de’iya keehi maaddiya ooratta kaaletuwaakka eti kaallana bessees. He maxaafatun qonccanabay Yihoowa aaro kehatettaa bessiya haraba gidana.



'Xoossaa aaro kehatettaa loytti gishite.'—1 PHe. 4:10 (Mentto 17-19 xeella)

### MISHIRAACHUWAA UBBATOO YOOTITE

<sup>17</sup> Wurssettay matido gishshawu, awu-deegaappenne aaruwan Kawotettaa mishiraachuwa yootana koshshees. (Mar. 13:10) Kawotettaa mishiraachoy Yihoo-wa aaro kehatettaa qonccissiyaaba. Nuuni haggaaaziyo wode heгаа ubbatoo hassayana koshshees. Nuuni sabbakiyoy Yihoowa bonchanaassa. Yihooway ooratta alamiyan oottanawu qaala gelidobay ubbay maalaalissiya a kehatettaa bessiyaaba gidiiyoogaa asawu yootiyoogan hegaadan oottana danddayoos.

<sup>18</sup> Nuuni haratuuyo markkattiyo wode, Kiristtoosa Kawotettaa haaruwan asay wozuwaa yarshshuwan kumetta hanotan go'ettanaagaanne wurssettan wottiyoobi baynna asa gidanaagaa yootana dandda-

17. Nuuni haggaaaziyo wode ubbatoo ay hassayana bessii?

18, 19. Yihoowa aaro kehatettaa nuuni waati nashshiyoo?

yoos. Geeshsha Maxaafay, “Mereta ubbai ba huuphen bashshaa aillettaappe issi gallassi kiyana; qassi he meretati Xoossaa naati aillettaappe kiyido bonchcho kes-saa shaakkana” yaagees. (Roo. 8:21) He-gee Yihoowa maalaalissiya kehatettan pollettana.

<sup>19</sup> Ajuutaa 21:4, 5n de'iya, Yihooway qaala gelido ufayssiyaabaa siyana koyiya ubbawu yootiyo gita maataa demmida; xiqisee hagaadan gees: “Xoossai eta aifiyaappe afutta ubbaa quccana. Hagaappe sinttanau haiqoinne kayyoi woi waasoinne sahoi de7enna. Aissi giikko, ceegabai xayiis.” Qassi araatan uttidaagee, Yihooway, “Taani ubbabaa ooraxissais” yaagiis. I zaarettidi, “Taani haasayiyoogee amanettiyaagaanne tuma gidiiyo gishshau xaafa” yaagiis. Nuuni Kawotettaa mishiraachuwa mishettidi yootiyo wode, Yihoowa aaro kehatettaa tumuppe nashshoos!

## Hizqqeela shemppo 37n odettida, naa'u gatimata issippe gattiyoogee aybiyyo leemisoo?

■ Israa'eelati Hidoootaa Biittaa zaaretti guyye simmidi issipettan de'anaagaa qonccissiya ufayssiya hidoootaa Yihooway Hizqqeelawu yootiis. He hiraagay wurssetta gallassatun Xoosaa asaa giddonkka issippetettay de'anaagaa bessiyaaba.

Yihooway hananabaa yootiya Hizqqeeli naa'u gatimatu bolli xaafanaadan yootiis. I issi gatimaa bolli “Hagee Yihudaa-gaanne aara de7iya Israa7eela asaagaa,” qassi haraa bolli “Hagee Efireemaagaa; ikka qassi Yoosefaagaanne aara de7iya Israa7eela asaagaa” yaagidi xaafana. He naa'u gatimati Hizqqeela kushiyan “issi gatima” gidana.—Hiz. 37:15-17.

“Efireemi” aybiyyo leemisoo? Huuphessa tammu zaretu kawotettaa koyro kawoy Iyorbbaami, guyyeppe wolqqaama



## NAA"U GATIMATA ISSIPPE GATTIYOOGAA




### BENI WODIYAA

Yihudaa naa'u zerettaa kawotettaa

Beni 537 K.K. naa'u kawotettan de'iya amarida asati beeta maqidasiyaa zaarettidi keexxanawu simmidi wode issippe gayttidosona

Israa'eela tammu zerettaa kawotettaa

Yihudaa gatimaa



Efireema gatimaa

### HA WODIYAA

Ayyaanan tiyettidaageeta

Ha wodiyan 1919ppe doomidi Xoosaa asay geeyiis, loddan loddan darajjayettiisinne 'issi wude' gididi oottanawu issippetettaa medhiis

Hara dorssata

gidida Efireema zare. (Zaa. 33:13, 17; 1 Kaw. 11:26) Ha zaree Yooseefa na'aa Efireema yara. (Qoo. 1:32, 33) Yooseefa aaway Yaaqoobi hara naatuppe a dummayidi anjiis. Hegaa gishshawu, tammu zaretu kawotettaa leemiso gidida gatimay “Efireemaagaa” geetettidoogee bessiyaaba. Huuphessa Israa'eela kawotettaa Asooreti 740n K.K. omooddidosona; Hizqqeeli he naa'u gatimatubaa hiraagaa xaafidoy hegaappe daro wodee aadhiina. (2 Kaw. 17:6) Hegaa gishshawu, he wode Israa'eelatuppe dariya baggay, Asooreta xoonida Baabloon Haaruwan ubbasan laalettidi de'ees.

Tohossa naa'u zaretu kawotettaanne geella huuphessa kawotettaappe attidaageeta 607n K.K., Baabilooneti omooddidosona. Yihudaa zare gidida kawoti ha naa'u zaretu haaridosona; qassi qeese Yerusalaamen de'iya beeta maqidasiyan oottiyo gishshawu Yihudan de'oosona. (2 Odi. 11:13, 14; 34:30) Hegaa gishshawu, ha naa'u zaretu kawotettay ‘Yihudaa’ gatiman leemisettidoogee bessiyaaba.

Leemiso gidida ha naa'u gatimati awude issippe gayttidonaa? Israa'eelati beeta maqidasiyaa zaarettidi keexxanawu 537n K.K. Yerusalaame simmido wode. Naa'u zerettaa kawotettaanne tammu zerettaa kawotettan de'iya amarida asati omoodduwaappe simmidi, zaarettidi issippetettaa medhidosona. Israa'eela naati zaarettidi shaahettokkona. (Hiz. 37:21, 22) Eti zaarettidi Yihoowayyo issippe goynnidosona. Israa'eelati issippetettaa medhaanaagaa hananabaa yootiya Isiyaasikka Ermmaasikka kasetidi yootidosona.—Isi. 11:12, 13; Erm. 31:1, 6, 31.

Tumu goynuwa xelliyaagan ha hiraagan qonccida keehippe koshshiya tumay aybee? Hegee, Yihooway bawu goynniyaageeti “issuwaa gidana” mala oottanaagaa yootidoogaa. (Hiz. 37:18, 19) Eti issuwaa gidanaagaa yootido qaalay nu wodiyan polettidee? Ee, polettiis. Koyro, Xoossaa asay zaaret-

tidi loddan loddan darajjayettidonne issippetettaa medhido, 1919n he hiraagay polettiyoogaa doommiis. Seexaanay eti muleera shaahettanaadan oot-tanawu baaxetiis; shin polettibeenna.

He wode, zaarettidi issuwaa gididaageetuppe daroti Yesuusaara saluwan kawonne qeese gidanawu hidootiyaageeta. (Ajj. 20:6) Eti leemiso hanotan Yihudaa gatimaa mala. Giddoppe attin, wodeppe guyyiyan, sa'an de'anawu hidootiya daroti ayyaanaaban Ayhuda gididaageetuura issippetettaa medhiyoogaa doommidosona. (Zak. 8:23) Eti Yooseefa gatimaa mala; qassi Kiristtoosaara haaranawu hidootokkona.

Ha wodiyan ha naa'u citati, hiraagan ‘ta ashkkaraa Daawita’ geetettida, issi Kawuwaa, Yesuus Kiristtoosa kaaletuwan issippetettan oottoosona. (Hiz. 37:24, 25) Yesuusi bana kaalliya ubbay “issuwaa gidana mala” woossiis; hegee ‘A Aaway a gid-don de'iyooogaadan qassi ikka ba Aawaa gid-don de'iyooogaadaana.’\* (Yoh. 17:20, 21) Qassi Yesuusi ayyaanan tiyettida ba amarida wudee ‘hara dorssatuura’ ‘issi wude’ gidanaagaa kasetidi yootiis. Eta ubbaa “heemmiyaageekka issuwaa gidana.” (Yoh. 10:16) Yesuusi yootidobay, sinttappe eta hidootay ayba gidikkokka ha wodiyan de'iya Yihoowa asaa gid-don de'iya ayyaanaabaa issippetettaa loytti qonccissees.

\* Yesuusi ba yuussawu malaata gididi leemisuwaa kaseti yootido wode, kasiyaa kaallidi hananabaa yootiis. Koyro, sintta xeera gididi oottiya, ayyaanan tiyettida amarida ishanntu cita gidana ‘ammanettida wozannaama ashkkaraabaa’ yootiis. (Maa. 24:45-47) Kaallidi, saluwan de'anawu hidootiya ubbatuyyo haniya leemisuwaa yootiis. (Maa. 25:1-30) Wurssettan, Kiristtoosa ishannta maaddanawu de'iya, sa'an de'anawu hidootiya asatubaa yootiis. (Maa. 25:31-46) Hegaadan, Hizqqeela hiraagan odettidabay koyrottidi saluwan de'anawu hidootiyaageetuura gayttidaagan ha wodiyan hananabaa qonccissees. Tammu zerettaa kawotettay sa'an de'anawu hidootiyaageetuyyo darotoo leemiso gidana xayikkokka, ha hiraagan odettida issippetettay sa'an de'anawu hidootiyaageetu gid-dooninne saluwan de'anawu hidootiyaageetu gid-don de'iya issippetettaa hassayanawu maaddees.



Ha maxeetiyaanne hara xuufeta naxan duuqqana danddayaasa



Ooratta Alamiyaa Birshshettaakka Intternetiyan hara qaalana nabbaba

[www.jw.org/wal](http://www.jw.org/wal)  
xeella woy  
kooddiyaa  
iskaane ootta



w16.07-WL  
160425